

M314: Ulrich von Liechtenstein: Frauendienst (M)

0,1 "mit rehten triuwen sô râte ich
0,2 daz dû sô iht verderbest dich
0,3 lebe als dich got habe herzen leben
0,4 unde habe daz er dir habe gegeben
0,5 von im vile willicliche vüre guot
0,6 ob dû daz tuost daz ist rehter muot
0,7 will dû dich anders danne er wile
0,8 des muotes ist dir alze vile ."
0,1 "niftel daz dich got gesegene
0,2 wizze ich hân mich sîn gar bewegen
0,3 swie mir gelinget oder geschihet
0,4 des wile ich dich verswîgen niht
0,5 ich entbiute ez endelîchen dir
0,6 unde bite dich daz dû ez ir
0,7 entbietest durch die triuwe dîn
0,8 der herzen lieben vrouwen mîn"
0,1 "daz lobe ich dir ûf mînen eit
0,2 unde wizze neve ez ist mir leit
0,3 daz dû sîn niht will abe gestân"
0,4 sus reit ich von der guoten danne
0,5 ze Greze sâr in daz Stîrelant
0,6 dâ ich vile guote meister vant
0,7 dem bezzisten tet ich al zestunt
0,8 gar allen mînen willen kunt
0,1 er sprach "ez ist nû gar enwiht
0,2 ich snîde iuch vore dem meien niht
0,3 kumet ir mir in dem meien her
0,4 bî mînen triuwen ich iuch wer .
0,5 ich mache iu iuwern munt alsô
0,6 daz ir sîn sît von schulden vrô
0,7 der dinge ich gar ein meister bin
0,8 ich hân dâr zuo vile ganzen sîn"
0,1 dô reit ich aber vrouwen sehen .
0,2 den winter gar daz was geschehen .
0,3 biz daz der süeze sumer quam
0,4 unde daz der winter ende nam
0,5 dô hôrte ich singen vogellîn
0,6 ich gedâhte "sîn mac zît sîn
0,7 daz mîn lîp sol ze Greze varn

0,8 got müeze mich aldâ bewarn”
0,1 sâr reit ich hin in gotes pflege
0,2 mir widervuor ûf mînem wege
0,3 sehet mîner vrouwen kneht den ich
0,4 erkante wole er bekante ouch mich
0,5 er vrâgete wâ ich wolte hin
0,6 unde war ze den zîten wær mîn sin
0,7 “geselle daz wile ich dir sagen
0,8 vremediū mære niht verdagen
0,1 nû wizze ich bin wole gesunt
0,2 unde wile mich machen gerne wunt
0,3 man sol ze Greze snîden mich”
0,4 der knappe guot der segnete sich
0,5 unde sprach “nû hêrre saget mir wâ”
0,6 ich sprach “geselle mîn sich dâ
0,7 der lefse der ich drî hân
0,8 der wile ich einen snîden danne”
0,1 “und ist ez wâr sô helfe iu got
0,2 sô spriche ich wole âne allen spot
0,3 ez ist ein wunderlich geschiht
0,4 si en weiz ich wæne mîn vrouwe niht
0,5 der wile ich ez sagen durch wunder grôz
0,6 got weiz wole ir sît sinne blôz
0,7 daz ir iuch wâget sunder nôt
0,8 ir müget dâ von geligen tôt”
0,1 “nû sage ez swem dû will vüre wâr
0,2 ich bin sîn in dem willen gar
0,3 ez muoz ûf dirre vart geschehen”
0,4 “entriuwen sô wile ich ez sehen
0,5 mac ez in iuweren hulden sîn
0,6 unde wile ouch sagen der vrouwen mîn
0,7 daz ir mich wellt dâ bî iu hân
0,8 ze schouwenne wie iu wirdet getân”
0,1 dô reit ich hin unde reit ouch her
0,2 hin ze Greze dar stuont mîn ger
0,3 dâ ich sâr mînen meister vant
0,4 der underwant sich mîn zehant
0,5 eines mântagen morgenes harte vruo
0,6 greif er mit sînen snîden zuo
0,7 er wolte mich binden ich wolte niht
0,8 er sprach “dâ von iu schade geschihet
0,1 und rüert ir iu als umbe ein hâr
0,2 ir nemet sîn schaden daz ist wâr”
0,3 ich sprach “daz wirdet von mir vermiten
0,4 ich bin dâ her zuo iu geriten
0,5 vile williclichen durch mîn nôt
0,6 unde solte ich von iu ligen tôt
0,7 daz is wâr man sihet mich wenken niht .

0,8 swie wê sô mir von iu geschihet”
0,1 mîn vorhte was ze wâre kranc
0,2 ich saz vore im ûf einer banc
0,3 er nam ein scharsahs in die hant
0,4 unde sneit den munt mir alzehant
0,5 hin ob den zenden er durchsneit
0,6 daz ich vile senftclîchen leit
0,7 daz snîden alsô gar ergie
0,8 daz ich dâ von gewankte nie
0,1 er hête mich meisterlîche gesniten
0,2 daz hête ouch ich manlîche erliten
0,3 der munt mir alzehant geswal
0,4 grôzer vile denne ein sleibal
0,5 der wunden tet er dô ire reht
0,6 daz sach dô gar mîner vrouwen kneht
0,7 er sprach zuo mir “müget ir genesen
0,8 sô bin ich gerne hier gewesen
0,1 dô ich nâheste von iu reit
0,2 unde daz ich mîner vrouwen seite
0,3 daz man iuch wolte snîden hier
0,4 daz wolte si mir gelouben nie
0,5 si sprach alsô er tuot sîn niht
0,6 mîn munt vüre wârheit dir des jihet
0,7 ez diuhete mich tumplicke gar getân
0,8 wolte er sich alsô snîden lân”
0,1 nû habe ich ez allez reht gesehen
0,2 waz an iu wunders ist geschehen
0,3 nû wile ich hinne von iu varn
0,4 der rîche got muoz iuch bewarn
0,5 unde mache iuch kürzlîche wole gesunt
0,6 ich wile tuon mîner vrouwen kunt
0,7 daz man den munt iu hât gesniten
0,8 unde ir daz manlîche habet erliten
0,1 “dû solt von mir der vrouwen dîn
0,2 niht sagen wan den dienst mîn
0,3 ich en getar niht mêr entbieten ir
0,4 wan swem dû wile dem sage von mir
0,5 swaz hier erliten hât mîn lîp
0,6 daz sî geschehen durch ein wîp
0,7 diu sprach mir stüente mîn munt niht wole
0,8 dâ von ich disen smerzen dole .
0,1 der diene ich alsô mîniu jâr
0,2 daz sage von mir wole offenbâr
0,3 swaz sô ir an mir missehaget
0,4 dem ist von mir gar widersaget
0,5 geviel ir niht mîn zeswiu hant
0,6 ich slüege si ab bî gote zehant
0,7 ich wile dâ von niht sprechen vile

0,8 ich wile doch niht wan daz si wile”
0,1 sus reit der knappe von mir danne
0,2 hier lac ich als ein wunde man
0,3 wole sehstehalp wochen oder mêt
0,4 mir was wole mir was wê
0,5 wê dâ von mîn lîp was wunt
0,6 sô was mîn herze wole gesunt
0,7 der minne twingen twanc mich sô
0,8 daz mir was wê unde was doch vrô
0,1 ich was et vrô swaz mir geschach
0,2 von hunger grôzen ungemach
0,3 unde ouch von durste den leit ich
0,4 ich kunde bringen niht in mich
0,5 zende unde munt mir tâten wê
0,6 ein salbe noch grüener denne der klê
0,7 streich man mir in mînen munt
0,8 diu stanc alsam ein vûler hunt
0,1 dô mich des lîbes nôt betwanc
0,2 daz ich az oder daz ich tranc
0,3 diu salbe gar danne in mich gie
0,4 dâ von mîn lîp den smac gevie
0,5 daz trinken ezzen widerstuont
0,6 mir . sô tet ich als die tuont
0,7 die vore siechtuome ouch ezzent niht
0,8 des wart mîn lîp vile gar enwiht
0,1 ich hân iu nû genuoc geseit
0,2 wie ich durch mîne vrouwen sneit
0,3 mînen munt nû sület ir mêt
0,4 hoeren wie ez vürebaz ergê
0,5 ze Greze ich alsô lange was
0,6 unze daz mîn lîp vile wole genas
0,7 dô reit ich danne sâr zehant
0,8 mit vrôuweden dâ ich mîn niftel vant
0,1 dô mich diu allerverrest sach
0,2 nû sület ir hoeren wie si sprach
0,3 “den munt dir nieman mêt sol
0,4 verwîzen er stât dir nû wole
0,5 sich hât dîn dinc gevüeget sô
0,6 daz ich sîn bin von herzen vrô .
0,7 ouch ist mir endelîche geseit
0,8 gar dînes lîbes arbeit
0,1 ouch ist daz von mir niht beliben
0,2 ich habe ez allez an geschriben
0,3 unde wile ez senden an die stat
0,4 dâ dîn lîp ie genâden bat
0,5 ich meine die lieben vrouwen dîn
0,6 der wile ich ûf die triuwe mîn
0,7 unde ouch ûf mîne sælde jehen

- 0,8 daz ez gar von ir ist geschehen
 0,1 von einem worte daz si sprach
 0,2 diu guote dô ich si nâheste sach
 0,3 daz ir dîn munt gevele niht
 0,4 mîn brief sol ouch verswîgen niht
 0,5 dîn manicvalten arbeit
 0,6 unde ouch dîn wernte stâticheit
 0,7 di dû mit triuwen gegen ir hâst
 0,8 unde ouch ir niemer ab gestât”
 0,1 “niftel mîn nû lône dir got
 0,2 vile süeze wîp getriuwer bote
 0,3 dû tuost mir als rehte wole
 0,4 daz ich ez von rehte dienen sol
 0,5 dû hâst mir sô wole getân
 0,6 daz ich sîn niht verdienen kan
 0,7 gegen mir dîn herze ie triuwe riet
 0,8 ich habe et aber niuwiu liet
 0,1 gesungen diu solt dû von mir
 0,2 durch mînen willen senden ir
 0,3 dô ich ze Greze siech lac
 0,4 die wîle ich si ze rihtenne pflac
 0,5 ire lop mir ofte sanfte tuot
 0,6 ire lop mir gibet vile hôhen muot
 0,7 ire lop mich ofte machet vrô
 0,8 nû hoere diu liet diu sprechent sô .”
 0, daz ist diu ander tanzwîse .
 0,1 ich ne weiz waz ich singe
 0,2 von der naht diu gibet mir vrôuwede niht .
 0,3 mîn hôchgedinge
 0,4 liget an dem tage wan er ist lieht .
 0,5 ouch ist sîn schîn
 0,6 der vrouwen mîn
 0,7 vile gelîch . des muoz er sælic sîn .
 0,1 er mac von schulden
 0,2 loben die naht der sæliclîchen lît .
 0,3 sô muoz ich dulten
 0,4 senentiu leit . dâ von trahte ich ir niht
 0,5 unde lobe den tac .
 0,6 swenne ich si mac
 0,7 sehen diu mir wole heilet sorgenslac .
 110cb,1 den tac ich êre
 110cb,2 dô ich die vile guoten êrste sach .
 110cb,3 sît iemer mêre
 110cb,4 gap diu naht mir leit unde ungemach .
 110cb,5 si ist mir gram
 110cb,6 unde ich ir sam .
 110cb,7 wole dir tac vile sælic sî dîn name

- 110db,1 sô mich besezzē
110db,2 nahtes habent die sorge alsam die schar
110db,3 des wirdet vergezzē
110db,4 sâr . sô mir der tac erschînet klâr .
110db,5 sô kümet ein wân
110db,6 daz ich sîle gân
110db,7 die vile schoenen tougen sehen an .
- 110eb,1 vile gerne ich wolte
110eb,2 loben die naht ergienge ez iemer sô .
110eb,3 daz ich ir solte
110eb,4 nâhen ligen diu mich nû tuot unvrô .
110eb,5 wer wær ich danne
110eb,6 ich sælic man .
110eb,7 wê daz mir es diu guot niht en gan .
- 111b,1 “liet unde brieu sande ich dar
111b,2 unde wile ir endelîchen gar
111b,3 entbieten swes dû hâst verjehen
111b,4 unde daz ich dich hân gesehen
111b,5 ich wile ouch ir daz machen kunt
111b,6 daz dir als rehte stât der munt
111b,7 vûre wâr als einem andern manne
111b,8 dâ wile ich ir niht liegen an .
- 112b,1 den brieu den si her wider mir
112b,2 sendet vriunt den wile ich dir
112b,3 senden ob er dir ist guot”
112b,4 “jâ liebiu niftel wolegemuot
112b,5 dîn bote mich vindet bî der mûr”
112b,6 mit solicher rede ich von ir vuor .
112b,7 vrô unde hôhes muotes heim
112b,8 den rechten wec gegen Liechtenstein
- 113b,1 sâr dô ich von dannen quam
113b,2 liet unde brieu mîn niftel nam
113b,3 unde sande diu williclîche zehant
113b,4 hîn dâ man mîn vrouwen vant
113b,5 der bote unlange bî ir was
113b,6 wan sâr dô si den brieu gelas
113b,7 unde ouch diu liet dô schreip si wider
113b,8 sehet einen brieu der gevrôuwet mich sider .
- 114b,1 dô der brieu kom der nifteln mîn
114b,2 zehant dô muoste ein bote ûf sîn
114b,3 bî dem sô sande si in mir
114b,4 des neic ich williclîchen ir

114b,5 der brieve der tet mîn herze vrô
114b,6 mîn muot der stuont von schulden hôhe
114b,7 sô gerne ich êr nie brieve gesach
114b,8 nû sûlet ir hoeren wie er sprach

114a,1 mîn hulde unde ouch den dienest
114a,2 mîn entbiute ich dir vile williclîchen . und
114a,3 tuon dir kunt . daz ich mich hebe von dem
114a,4 nâhesten mântage von dem hûse . dâ ich
114a,5 allzane ûf bin . unde var hin ze dem hûse als
114a,6 dû wole weist unde bin über naht in dem
114a,7 markete der bî dir lît . nû bite ich dich .
114a,8 dâ dû des iht lâst . dû komest dar zuo .
114a,9 mir . sô wile ich dir allez des antwûrten
114a,10 des dû mir entboten hâst . wile ouch dîn
114a,11 neve dar komen den sihe ich gerne . durch
114a,12 sînen munt wie im der stê . unde durch
114a,13 anders niht

115a,a âventiure wie der Uolrîch mit sîner
115a,b vrouwen wart êrst redehaft
115a,1 dô mir der brieve gelesen wart
115a,2 ich huop mich zuo ir an di vart
115a,3 mir was vile liebe dâr an geschehen
115a,4 daz ich die guoten solte sehen
115a,5 ich reit zuo ir vile hôchgemuot
115a,6 dô was si leider sô behuot
115a,7 daz ich si den âbent nie gesach
115a,8 dâr an vile leide mir geschach

116a,1 mîn lîp entslief des nahtes nie
116a,2 des morgenes dô diu sunne ûf gie
116a,3 dô stuont ich ûf unde gie zehant
116a,4 hin dâ ich ire gesinde vant
116a,5 ritter unde vile manigen kneht
116a,6 die gruoze ich wole daz was mîn reht
116a,7 ire danken daz was zûhte rîche
116a,8 unde ire gebærde minniclich

117a,1 dâr nâch vile schiere was unlanc
117a,2 ire kappellân eine messe sanc
117a,3 dâ mir vile liebe von geschach
117a,4 wan ich dâ mîne vrouwen sach
117a,5 mit grôzen vorhten ich dar gie
117a,6 dâ mich diu tugentrîche entvie
117a,7 dô si mich sach diu guot mir neic
117a,8 den gruoze mit Worten si versweic

118a,1 diu messe gar ze kurz mir was
118a,2 swaz man dâ sanc oder las
118a,3 des vernam ich alles niht
118a,4 mir tet sô wole diu anegesiht
118a,5 an daz vile reine süeze wîp
118a,6 daz lützel hôrte dâ mîn lîp .
118a,7 swaz man dâ sanc oder swaz man sprach
118a,8 ich was et wan der si an sach .

119a,1 diu messe kurzlîche endete sich
119a,2 alzehant dô hiez man mich
119a,3 unde ander man gar alle ûz gên .
119a,4 man lie uns dâ niht langer stên .
119a,5 mîn vrouwe enbeiz unde reit zehant
119a,6 ich gie hin dâ ich mîne niffel vant
119a,7 diu lachete unde sach mich guotlîche an
119a,8 si sprach “dû bist ein sælic man

120a,1 mîn vrouwe hât erloubet dir
120a,2 daz dû hiute selbe solt mit ir
120a,3 reden swaz dich dunket guot
120a,4 si ist gegen dir niht ungemuot
120a,5 dû solt zuo ir hiute ûf dem wege
120a,6 rîten sô ez sich vüegen mege
120a,7 unde rede mit ir swaz dû wilt
120a,8 unde mache ez iedoch niht ze vile”

121a,1 des was ich vrô unde vile gemeit
121a,2 zehant ich nâch der werden reit
121a,3 dô ich si vore mir rîten sach
121a,4 daz herze mîn ûz vröuweden sprach
121a,5 “nû dâr nû solt dû reden mit ir
121a,6 allez daz gevalle dir
121a,7 si rîtet vore dir sunder huote
121a,8 rede mit ir swaz dich dunke guot”

122a,1 sâr reit ich baltlîche zuo ir dar
122a,2 dô si mîn bî ir wart gewar
122a,3 si kêrte sich von mir umbe hine
122a,4 dâ von sô zagehaft wart mîn sin
122a,5 daz mir erstumbete an der stunt
122a,6 diu zunge mîn unde ouch der munt
122a,7 unde mir daz houbet nider seic
122a,8 mîn lîp reht als ein stumbe sweic .

123a,1 ein ander rîtær zuo ir reit .
123a,2 dô habete ich ûf unde was verzeit
123a,3 in vorhten reit ich hinden nâch

123a,4 daz herze mîn ot aber sprach
123a,5 “jâ dû vile gar verzageter lîp
123a,6 unde vûrhtest dû ein sô guot wîp .
123a,7 si hête dir weiz got niht getân
123a,8 wê daz dîn munt niht reden kan

124a,1 lîp nû hoere waz ich sage
124a,2 wile dû mit Worten sîn ein zac
124a,3 sô kan dir niemer liep geschehen
124a,4 des wile ich ûf mîn sælde jehen
124a,5 unde scheides dû alsô von ir
124a,6 daz si niemer mêre dir
124a,7 wirdet holt bî allen dînen tagen
124a,8 si muoz dich hân vûre einen zagen”

125a,1 mîn herze vile gestrâfete mich
125a,2 dâ von ermannete ot aber ich
125a,3 unde reit zuo ir dô daz geschach
125a,4 diu reine sûeze mich an sach
125a,5 von ire an sehenne mîn lîp erschrac
125a,6 daz ich et aber swîgennes pflac
125a,7 der minnen kraft mir alzehant
125a,8 den mînen munt zesamene bant

126a,1 ir sûlet vûre wâr gelouben daz
126a,2 daz ich niht weste wâ ich saz
126a,3 “lîp” sprach aber daz herze mîn
126a,4 “daz dû unsælic müezest sîn
126a,5 dû bist ze wâre ein boese man
126a,6 dô si dich sach sô guotlîche an
126a,7 daz dû spræche gegen ir niht
126a,8 des muost dû iemer sîn enwiht”

127a,1 “sich herze mîn got weiz ez wole
127a,2 swenne ich gegen ir iht sprechen sol
127a,3 ich weiz niht wâ von ez geschihet
127a,4 daz ich ein wort mac sprechen niht
127a,5 mir wirdet versperret sô der munt
127a,6 daz ich ze wâre sâr an der stunt
127a,7 ein wort her vûre niht bringen kan
127a,8 des bin ich ein unsælic man”

128a,1 “lîp dû solt gelouben mir
128a,2 dû schaffest grôz unsælde dir
128a,3 ich wile dir es ûf mîn triuwe jehen
128a,4 mir unde dir muoz vile wê geschehen
128a,5 unde niemer wole decheine stunt
128a,6 unde tuot ir niht dîn boeser munt .

- 128a,7 mit worten kunt den willen mîn
 128a,8 ez muoz dîn unde mîn ende sîn
- 129a,1 nû sich dû vile boeser lîp
 129a,2 vore dir dort rîtet daz werde wîp
 129a,3 vile gar eine unbehuot
 129a,4 wie bist dû alsô ungemuot
 129a,5 daz dû niht rîtest zuo ir dar
 129a,6 unde sage ir dînen willen gar
 129a,7 nû dar ez ist vûre wâr mîn rât
 129a,8 dir wirdet sîn lîhte niemer mêre stat”
- 130a,1 ich reit et aber zuo ir dar
 130a,2 von vorhten was ich ungevar
 130a,3 mîn angest was ze sprechenne grôz
 130a,4 daz herze mîn mir manigen stôz
 130a,5 mit sprûngen stiez an mîne brust
 130a,6 ze redenne was gar sîn gelust
 130a,7 ez sprach “nû sprich nû sprich nû sprich
 130a,8 sît daz nû nieman irret dich”
- 131a,1 ich tet vûre wâr wole zehen stunt
 131a,2 gegen ir ze sprechenne ûf den munt
 131a,3 dô was diu zunge mir gelegen
 131a,4 si wolte decheines wortes pflegen
 131a,5 ich wile dâ von niht sprechen mêr
 131a,6 ich schiet ot aber von ir als êr .
 131a,7 daz ich gegen ir nie wort gesprach .
 131a,8 des tages mir vûnf stunt daz geschach
- 132a,1 diu tageweide ein ende nam
 132a,2 diu reine sûeze guote quam
 132a,3 dâ si des nahtes solte sîn
 132a,4 des was unvrô daz herze mîn
 132a,5 die vrouwen hiez man dô abe heben
 132a,6 ich bat mir daz hepîsen geben
 132a,7 ich huop die vrouwen abe vile gar
 132a,8 ir was vile manigiu dâr under klâr
- 133a,1 noch habete si dort diu valsches vrî
 133a,2 ûf ire pferde ir stuonten bî
 133a,3 ritter unde knappen vile
 133a,4 mit den hête si ire schimpfes spil
 133a,5 daz hepîsen ich dar truoc
 133a,6 si sprach “ir sît niht starc genuoc
 133a,7 ir müget mich abe geheben niht
 133a,8 ir sît kranc dâr zuo enwiht”

- 134a,1 des schimpfes wart gelachet dô
134a,2 dô trat si ûf daz hepisen sâr
134a,3 dô si her von dem satel sleif
134a,4 bî mînem hâr si mich begreif
134a,5 verholene daz ez nieman sach
134a,6 diu guot mir einen loc ûz brach
134a,7 “daz habet iu des ir sît verzaget
134a,8 mir ist niht wâr von iu gesaget”
- 135a,1 diu guote zuo ire vrouwen gie
135a,2 mîn lîp der stuont al trûric hier
135a,3 ich gedâhte wê wie ist mir geschehen
135a,4 ich muoz des wole von schulden jehen
135a,5 daz nie man alsô boeser wart
135a,6 wie hân ich mich gegen ir bewart
135a,7 si wirdet mir niemer mêre holt
135a,8 des hât si reht ich hân ez versolt
- 136a,1 in den gedanken sô stuont ich
136a,2 ein ritter der hiez balde mich
136a,3 varn . man solte die vrouwen lân .
136a,4 an ire gemach dô reit ich danne .
136a,5 ze herbergen in die stat
136a,6 got ich vile vlîziclichen bat
136a,7 daz er mir schiere næme daz leben
136a,8 unde swaz er hête mir hier gegeben
- 137a,1 ab wege ich in ein kamer vuor
137a,2 den liuten ich vile tiure swuor
137a,3 ich wære siech daz was ouch wâr
137a,4 der lîp mich allenthalben swar
137a,5 daz herze mîn hête michel nôt
137a,6 ez was vile nâch vore leide tôt
137a,7 ich want mich her ich want mich hin
137a,8 ich hête verwandelt nâch den sin
- 138a,1 ich sprach ou wê ou wê “ou wê wê
138a,2 wê mir hiute unde iemer mêr
138a,3 ou wê daz ich ie wart geboren
138a,4 wie hân ich vrôuwede unde êre verloren
138a,5 wie hât unsælde mir vergeben
138a,6 unde solte ich tûsent jâr nû leben
138a,7 ich würde niemer mêre vrô
138a,8 daz ist mîn reht nû sî alsô
- 139a,1 mîn lîp ist wole unsælden wert
139a,2 der bin ich vollicliche gewert
139a,3 ich muoz nû iemer haben leit

- 139a,4 daz leit mîn lîp von schulden treit
 139a,5 swaz leides iemer mir geschihet
 139a,6 des hân ich vûre übel niht
 139a,7 wan ich ez vile wole verdienet hân
 139a,8 ich sol von rehte unsælde hân
- 140a,1 ô wê wê unde iemer wê
 140a,2 ze wiu sol ich armer iemer mêr
 140a,3 sît daz ich bin sô gar enwiht
 140a,4 daz ich getorste sprechen niht
 140a,5 wider mîner vröuweden hort .
 140a,6 mînes willen doch ein wort
 140a,7 des muoz mîn munt unsælic sîn
 140a,8 iemer und diu zunge mîn
- 141a,1 mir wære liep unde wær ich tôt
 141a,2 sît daz ich in senelîcher nôt
 141a,3 nû iemer mêr belîben muoz
 141a,4 mir wirdet niemer sorgen buoz
 141a,5 ich muoz in sorgen iemer sîn
 141a,6 sît daz ich hân die vrouwen mîn
 141a,7 die ich ze vröuweden hête erkoren
 141a,8 von mîner bôsheit sô verloren”
- 142a,1 waz wellt ir daz ich mêre sage
 142a,2 ich was die naht in maniger klage
 142a,3 unze daz mir kom der ander tac
 142a,4 iezuo ich saz iezuo ich lac
 142a,5 iezuo ich stuont iezuo ich gie
 142a,6 ich want mich dort ich want mich hier
 142a,7 die hende mîn ich ofte want
 142a,8 mîner mâge mich einer alsô vant
- 143a,1 der gie des morgenes vruo zuo mir
 143a,2 er sprach zuo mir “waz wirret dir”
 143a,3 ich jach “mir ist an dem herzen wê
 143a,4 unde wirdet des ie mêr unde mêr
 143a,5 ich wæne ez welle mir bresten abe
 143a,6 dâ von ich hân dise ungehabe
 143a,7 ich mac gesitzen noch gestên
 143a,8 mir tuot ot niht sô wole sô gên .”
- 144a,1 er sprach “ez ist ein arzât hier”
 144a,2 “den bringe mir” zehant er gie
 144a,3 hine nâch dem meister in die stat
 144a,4 ein pfert ich mir gewinnen bat
 144a,5 unde einen kneht der mit mir reit
 144a,6 zehant ich langer dâ niht beit

- 144a,7 ich ran alsam ein tobenter man
144a,8 hin dâ ich die guoten hête lân
- 145a,1 dô ich dar quam geloubet daz
145a,2 mîn vrouwe dort ûfe ire pferde saz
145a,3 unde reit die strâze gegen mir her
145a,4 nâch mînes senenten herzen ger
145a,5 nâch vrouwen siten si her reit .
145a,6 in einer kappen . wole gekleit
145a,7 dô si mich sach mir wart genigen
145a,8 von mir wart ouch niht mêr geswigen
- 146a,1 ich sprach “genâde vrouwe mîn
146a,2 ir sület durch got genædic sîn
146a,3 mir . unde durch die werdicheit
146a,4 der got an iuch hât vile geleit
146a,5 genâde vrouwe genâde rîche
146a,6 genâdet mir genædiclîche
146a,7 ir sît an der mîn vröuwede lît
146a,8 gar mîner vröuweden hôchgezît
- 147a,1 ir sület gelouben mir vüre wâr .
147a,2 ich hân iu alliu mîniu jâr
147a,3 gedienet sît ze der süezen stunt
147a,4 daz ir allrêrest mir wurdet kunt
147a,5 ich bin iu dienestes undertân
147a,6 mit triuwen als ich bezziste kan
147a,7 mîn dienst ist an iuch geleit
147a,8 mit lûterlîcher stæticheit
- 148a,1 vrouwe ob al den vröuweden mîn
148a,2 nû lât mich iuweren ritter sîn
148a,3 sô daz ir dienst erlaubet mir
148a,4 durch iuwer tugent sô sület ir
148a,5 gedenken daz ich nie gewan
148a,6 noch iemer mêr gewinnen kan
148a,7 sô liebez niht sô iuweren lîp
148a,8 vile reine süeze sælic wîp
- 149a,1 bedenket mich durch iuwer tugent
149a,2 durch iuwer hôchgelobete jugent
149a,3 durch iuwer hôhe sælicheit
149a,4 bedenket mîne stæticheit
149a,5 lât mich geniezen daz ir sît
149a,6 diu liebestiu mir gar âne strît
149a,7 tuot mir swie iuwer genâde sî
149a,8 iu ist mîn dienst iemer bî

150a,1 ich wile durch iuch vile werdez wîp
150a,2 gerne wâgen mînen lîp
150a,3 mit ritterlîcher arbeit
150a,4 mîn dienest wirdet an iuch geleit
150a,5 swâ mit ein ritter dienen sol
150a,6 dâ mit kan ich iu dienen wole
150a,7 ich sol ich muoz ich gerne wile
150a,8 iu dienen an mîn endes zil”

151a,1 “swîget ir sît gar ze kint
151a,2 unde gegen sô hôhen dingen blint
151a,3 ir sûlet die rede lâzen sîn
151a,4 als liep iu sî die hulde mîn
151a,5 unde rîtet von mir balde hinne
151a,6 iu ist noch gar ze tump der sin
151a,7 iu mac diu rede ze schaden komen
151a,8 si kan iu niemer niht gevrumen”

152a,1 “vile liebiu vrouwe ir habet daz wâr
152a,2 ich bin ze tump noch dâr zuo gar
152a,3 daz ich mit iu sô niht en kan
152a,4 gereden als ich willen hân
152a,5 anders bin ich wole sô wîs .
152a,6 daz ich behalte wole rîtærs prîs
152a,7 iu ze dieneste sunder wanc
152a,8 dâr zuo sô bin ich niht ze kranc”

153a,1 “vart von mir daz ist mîn rât
153a,2 ob iuwer lîp iht sinne hât
153a,3 lât mit mir iuwer rûnen sîn
153a,4 ir wîzet wole man hûetet mîn
153a,5 hât ieman iuwer rede vernomen
153a,6 mit mir daz mac ze schaden komen .
153a,7 ir sûlet mich mit gemache lân
153a,8 daz is wâr ir sît ein müelich man”

154a,1 diu guote sâr hin umbe sach
154a,2 zuo einem ritter si dô sprach
154a,3 “ir sulet zuo mir ouch rîten her
154a,4 sol bî mir nieman rîten mêr
154a,5 niuwan ein rîtær daz ist niht guot
154a,6 sehet daz ir ez iemer mêr getuot
154a,7 ez stât iu allen übel an
154a,8 sol mit mir rîten wan ein man .”

155a,1 ich sprach “si hât iu reht geseit
155a,2 ez ist ze wâr ein unhövischheit
155a,3 ich weiz daz wole ez missestât

- 155a,4 daz ir si selp ander rîten lât
155a,5 nû heizet mêr ritte rîten her
155a,6 sît daz an iuch mîn vrouwe ger”
155a,7 mêr danne sehse ir sâr dar riten
155a,8 der sus der sô nâch ritters siten
- 156a,1 mîn rede muoste mit ir ein ende hân
156a,2 ich nam urloup unde reit von dannen
156a,3 ich was von herzen hôchgemuot
156a,4 mich dûhte mîn gelinge wær guot
156a,5 daz ich hête mîner vrouwen schîn
156a,6 geseit ein teil den willen mîn
156a,7 des was ich innicliche vrô
156a,8 mîn muot gestuont êr nie sô hôh
- 157a,1 dô suochte ich ritterschaft zehant
157a,2 swâ man die in dem lande vant
157a,3 dâ muoste man mich ze wære sehen
157a,4 unde ouch vûre einen ritte spehen
157a,5 des sumers mir sô wole geschach
157a,6 daz ich ze rehter tjoste stach
157a,7 einen werden ritte nider
157a,8 des dankete mir mîn vrouwe sider
- 158a,1 ich sagete iu mîner sælden mêr
158a,2 wan daz ich vûrhte der unde der .
158a,3 sô spreche ich rûeme mich ze vile
158a,4 dâ von ich es vile verswîgen wile
158a,5 ich was ot hôhes muotes rîche
158a,6 den sumer vuor ich ritte lîche
158a,7 reht als ein vrouwen ritte sol
158a,8 des muoste mir gelingen wole
- 159a,1 der winter was ot aber komen
159a,2 der sumer hête ouch ende genomen
159a,3 dô muoste man lâzen ritterschaft
159a,4 dô tihte ich liet unde ein boteschaft
159a,5 unde sande ez sâr der nifteln mîn
159a,6 diu iemer sælic müeze sîn
159a,7 diu sande si beidiu balde dar
159a,8 dâ ich hin dienete mîniu jâr
- 160a,1 der bote wart balde dar gesant
160a,2 er was der guoten wole bekant
160a,3 si hiez in willekomen sîn
160a,4 “genâde” sprach er “vrouwe mîn
160a,5 ich hân ein buochelîn iu brâht
160a,6 daz sûlet ir lesen gegen der naht

- 160a,7 dâ stêt an ein vile guot gebet
 160a,8 vile tugentlîchiu vrouwe sêt”
- 161a,1 daz buochelîn sâr diu süeze nam
 161a,2 als ez ire tugenden wole gezam
 161a,3 si wânte dâ stüente an ein gebet
 161a,4 diu reine guot ez ûf tet
 161a,5 si schouwete ez hier si schouwete ez dort
 161a,6 dâ stuonten an vile süeziu wort
 161a,7 dort unde hier si ez gar gesach
 161a,8 nû hoeret wie daz buochelîn sprach
- 870a,1 unde bant mir abe den helm mîn
 870a,2 er sprach “vile edeliu künigîn
 870a,3 ich lâze iuch hier niht stechen mêr
 870a,4 ir habet verstoichen drîzic sper
 870a,5 hier des ist iu alze vile .
 870a,6 niht mêr ich iu es gestaten wile”
 870a,7 mich nam der hôchgemuote man
 870a,8 sâr bî dem zoume unde zoumte mich dannen
- 871a,1 mit mir er von den liuten reit
 871a,2 dâ ein tepich was nider geleit
 871a,3 dâr ûfe entwâpenete ich mich dâ
 871a,4 unde kleite mich als ein vrouwe sâr
 871a,5 ich wart dâ schiere wole gekleit
 871a,6 in kostlîchiu vrouwenkleit
 871a,7 ez wart nie vrouwe gekleidet baz
 871a,8 ûf ein schoen pferde ich saz
- 872a,1 ich reit dâ ich tjostieren sach
 872a,2 dâ liten ritter ungemach
 872a,3 mit rîterlich arbeit
 872a,4 vile maniger ungemach dâ leit
 872a,5 man tjostierte dort unde hier
 872a,6 vile manic schoene tjoste ergie
 872a,7 ûf dem velde was grôzer krach
 872a,8 vile trunzûne man dâ vallen sach
- 873a,1 dâ wart verstoichen vile manic sper
 873a,2 waz sol ich iu sagen mêr
 873a,3 wan daz dâ was schoene rîterspil .
 873a,4 dâ wart getjostieret vile .
 873a,5 unde manic schoene tjoste geriten
 873a,6 mit kunst nâch ritterlîchen siten
 873a,7 dâ manic schoene puneiz geschach
 873a,8 dô mîn lîp des genuoc gesach .

- 874a,1 di ritter ich ez lâzen bat .
 874a,2 dô zogeten wir sâr gar gegen der stat
 874a,3 mîn lîp mit zûhten was gemeit
 874a,4 ein ritter sâr dô zuo mir reit .
 874a,5 der sprach “vile edeliu kûningîn
 874a,6 iu hât entboten der hêrr mîn
 874a,7 von Kûenringen mîn hêrr Hademâr
 874a,8 er well iu dienen sîniu jâr
- 875a,1 dâr umbe daz ir hier bîtet sîn
 875a,2 vile hôchgelobeti kûningîn
 875a,3 biz daz sîn lîp gewâpenet sich
 875a,4 des hiez er vrouwe iuch biten mich
 875a,5 daz er versteche gegen iu ein sper
 875a,6 noch hînaht daz ist des heldes ger
 875a,7 swaz iuwer wille dâr an sî
 875a,8 daz entbietet im vrouwe wandels vrî”
- 876a,1 ich sprach “nû saget hêrrn Hademâr
 876a,2 daz mîn lîp ist hînaht müede gar
 876a,3 daz er daz durch sîn vuoge tuo
 876a,4 unde sich enthalte unz morgene vruo
 876a,5 unde wile er danne zehen sper
 876a,6 verstecken gerne ich in des wer
 876a,7 ich weiz wole er ist sô wolegemuot
 876a,8 daz er ez mit guotem willen tuot”
- 877a,1 der bote sprach “edeliu kûningîn
 877a,2 er sol ez hînaht gerne lâzen sîn
 877a,3 sît ir es im morgene sît bereit”
 877a,4 dâ mit der bote von mir reit
 877a,5 unde sagete hêrrn Hademâr
 877a,6 swaz ich im entbôt mit zûhten gar
 877a,7 er sprach “ich hân ez wole vûre guot
 877a,8 sît si ez morgene gerne tuot .”
- 878a,1 dâ mit reit ich an mînen gemach
 878a,2 eine rede man dô dâ von mir sprach
 878a,3 diu was mir herzenlîchen leit
 878a,4 man sprach “diu kûninginne hât verseit
 878a,5 hêrrn Hademâr ire tjoste hier
 878a,6 daz tet si vûre wâr ritter nie
 878a,7 ich wæne si ez dâr umbe hât getân
 878a,8 daz man des jîhet er minne die man .”
- 879a,1 dô diu rede alsô verre quam
 879a,2 daz si hêrr Hademâr vernam
 879a,3 ir sület vûre wâr gelouben daz

- 879a,4 er wart mir herzelîche gehaz
 879a,5 daz was doch âne die schulde mîn
 879a,6 er sprach “ez muoz diu kûningîn
 879a,7 umbe dise rede geligen nider”
 879a,8 des vleiz er sich vile sêre sider
- 880a,1 in mîner herberge was ich dô
 880a,2 unde hête gemach mîn muot stuont hôhe
 880a,3 ein ritter kom zuo mir zehant
 880a,4 der iu von mir hier wirdet genant
 880a,5 von Kûnegesbrunne der biderbe man
 880a,6 hêrr Êngelschalch der nie gewan
 880a,7 decheinen unritterlîchen muot
 880a,8 er hête vore schanden sich behuot
- 881a,1 der biderbe tet mir an der stunt
 881a,2 durch sîne zuht vile heimelîche kunt
 881a,3 daz mir hêrr Hademâr wær gehaz
 881a,4 unde sagete mir rehte gar umbe waz
 881a,5 er warnete des durch triuwe mich
 881a,6 “hêrr Hademâr der hât sich
 881a,7 vermezzen tiure er vüege iu leit
 881a,8 daz hân ich iu durch guot geseit”
- 882a,1 ich sprach “des mac wole werden rât
 882a,2 swen er gegen mir geschaffen hât
 882a,3 mit hurt dem mac dâ schade geschehen
 882a,4 als lîhte als mir daz lâze ich sehen
 882a,5 swer mich mit hurt sol rîten nider
 882a,6 ich trîbe mîn ors gegen im hin wider
 882a,7 alsô daz er lîhte an der zît
 882a,8 ze hûfen mit mir nider lît”
- 883a,1 doch dankete ich dâ dem biderben manne
 883a,2 des warnennes des er hête getân
 883a,3 mich dâ mit schiet er von mir
 883a,4 ze ruowenne was dô al mîn gire
 883a,5 durch ruowe ich an dem bette lac
 883a,6 biz daz mir kom der ander tac
 883a,7 dô kleite ich mich unde reit von dannen .
 883a,8 mit mir reit dannen manic biderbe man .
- 884a,1 ich hête mich aber wole gekleit
 884a,2 gegen Niuwenburc mîn lîp sâr reit
 884a,3 über di Tuonouwe vuor ich dâ
 884a,4 unde reit jenhalp ze Niuwenburc sâr
 884a,5 dâ mîn wole hundert ritter biten
 884a,6 die biderben schône gegen mir riten

- 884a,7 si vlizzen des mit willen sich
884a,8 daz si dâ schône entviengen mich
- 885a,1 ez was dannoch des morgenes vruo
885a,2 mit ritterschaft wir griffen zuo
885a,3 dâ wart ein schoene ritterspil
885a,4 der ritte was dar komen vile .
885a,5 dâ von ich sîn dâ vruo began
885a,6 dâ was vile manic biderbe man .
885a,7 dâ zimierte maniger wole den lîp
885a,8 durch diu vile reinen süezen wîp .
- 886a,1 ich was ouch dâ gezimiert wole
886a,2 von rehte ich iu nû sagen sol
886a,3 wer dâ des êrsten mit mir stach
886a,4 hêrr Gotevrit von Totzenbach
886a,5 was genant der biderbe man
886a,6 sîn lîp untugende nie gewan
886a,7 er warp umbe vrouwen umbevanc
886a,8 vile guotiu liet er von in sanc
- 887a,1 dâr nâch von Stentz hêrr Uolrîch
887a,2 mit mir dâ tjostierte ritterlîche
887a,3 nâch dem hêrr Otte von Ottenstein
887a,4 ein sper verstach daz was niht kleine
887a,5 ûf mir dô kom der starke man
887a,6 von Kiowe unde rante mich an
887a,7 sîn sper er durch den schilt mîn stach
887a,8 daz man vile verre hôrte den krach
- 888a,1 von Hakenberc der arge Heinrîch
888a,2 mit mir dâ stach vile lobelîche
888a,3 der was an güete gar verzaget
888a,4 unde hête iedoch sîn lîp bejaget
888a,5 mit ritterschaft vile hôhen prîs
888a,6 der karge was an guote wîs
888a,7 unde was ouch manlîches herzen gar
888a,8 diu beidiu sint von im wâr
- 889a,1 ich nante si iu gar wole sunderlîche
889a,2 die dâ mit mir vile ritterlîche
889a,3 stâchen wan daz ich weiz wole
889a,4 daz man diu mære kürzen sol
889a,5 swâ man mit vuoge iemer kan .
889a,6 dâ was manic minne gernter man
889a,7 in vrouwendieneste schône komen
889a,8 die sach man sper mit tjoste drumen

890a,1 des tages mit tjoste mir daz geschach
890a,2 daz man mir von dem houbete stach
890a,3 vüre wâr drî stunt den helm mîn
890a,4 den ich mit snüeren doch sîdîn
890a,5 ûf gebunden hête vile wole
890a,6 als man die helme binden sol
890a,7 daz ich dâ von geneigte mich nie
890a,8 des wunderte jene dise unde die

891a,1 diu ritterschaft werte al den tac
891a,2 daz nieman anders niht dâ pflac
891a,3 wan tjostieren durch diu wîp
891a,4 man vant dâ müeden ritters lîp
891a,5 daz mohte der mîne wole einer sîn
891a,6 wan ich dâ durch die vrouwen mîn
891a,7 tjostierte unz an den âbent gar
891a,8 des wart ich müede daz ist wâr

892a,1 dô ich wole vierzic sper verstach
892a,2 unde daz hêrr Hademâr ersach .
892a,3 daz dâ von müede was mîn lîp
892a,4 kranc vüre wâr als ein wîp
892a,5 dô tet er ein unhövisch dinc
892a,6 er brâhte gegen mir sâr ûf den rinc
892a,7 einen ritter der mich nider
892a,8 solte rîten daz rou in sider .

893a,1 dô man in gegen mir vüeren sach
893a,2 von Kûnegesbrunne der biderbe sprach
893a,3 hêrr Êngelschalc “vrouwe kûningîn
893a,4 sehet ditz sol der ritter sîn
893a,5 der iuch sol nider rîten hier
893a,6 ich gesach sô grôze unvuoge nie
893a,7 bî mînen zîten daz ist wâr
893a,8 als si begât hêrr Hademâr”

894a,1 ich sprach “des mac wole werden rât
894a,2 ob er mich hurtes niht erlât
894a,3 sô lâze ich iuch daz wole gesehen
894a,4 daz im hier schade mac geschehen
894a,5 vüre wâr noch baz danne mir
894a,6 daz sület vüre wâr gelouben ir
894a,7 ir sület vüre wâr wole wîzen daz
894a,8 ich kan den puneiz rîten baz”

895a,1 im was gehaz gar mîn gedanc
895a,2 den puneiz machete ich dô lanc
895a,3 dô treip ouch er dô gegen mir her

- 895a,4 ez was gegen im gar al mîn ger
 895a,5 daz ich in koeme twerhes an
 895a,6 ich kom ze twerhes an den man
 895a,7 unde traf in mit dem rosse mîn
 895a,8 sô daz dâ strûchen muoste daz sîn
- 896a,1 ich kom mit hurt sô an den man
 896a,2 daz ich im von dem satel danne
 896a,3 reit bûsch unde ouch den stegereif
 896a,4 wan daz in ein sîn vriunt begreif
 896a,5 sâr dô der hurt ergangen was
 896a,6 er wære gevallen an daz gras
 896a,7 von Kûenringen hêrr Hademâr
 896a,8 brâhte einen andern satel dar
- 897a,1 den leite man ûf daz ros aldâ
 897a,2 zwei anderiu sper gap man uns sâr
 897a,3 ich dâhte alsô “ez muoz nû sîn
 897a,4 daz nime ich ûf die triuwe mîn
 897a,5 wir müezen beide hier nider ligen
 897a,6 oder unser einer sô gesigen .
 897a,7 daz er die êre sô vüeret hin
 897a,8 daz ist mîn muot unde ouch mîn sîn”
- 898a,1 mîn ors treip ich vile vaste dar
 898a,2 dô er an mir des wart gewar
 898a,3 daz ich in mit hurt dâ wolte bestân
 898a,4 dô began sô wîchen mir der man
 898a,5 daz sîn gespottet wart genuoc
 898a,6 mîn ors mich doch sô zuo im truoc
 898a,7 daz ich im mit dem tjoste mîn
 898a,8 stach von dem houbete den helm sîn
- 899a,1 ich sage iu wie der biderbe hiez
 899a,2 der dâ den hurt durch vorhte liez
 899a,3 von Busenberc was er genant
 899a,4 hêrr Bobe unde hête den muot gewant
 899a,5 in vrouwendienest daz ist wâr
 899a,6 den dienete er gerne sîniu jâr
 899a,7 mit rehten triuwen sunder wanc
 899a,8 des sol er iemer haben danc .
- 900a,1 nû was der tac ouch nâch zergân
 900a,2 dô kom gegen mir ein hōvischer man
 900a,3 von Anschouwe mîn hêrr Rüedegêr
 900a,4 sîn wâpenroc sîn decke sîn sper
 900a,5 was allez liechter varwe rôt
 900a,6 er hête umbe êre grôze nôt

- 900a,7 in vremeden landen ofte erliten
900a,8 unde manige schoene tjoste geriten
- 901a,1 diu naht den tac hête gar verswant
901a,2 nâch grôzen liechten ich dô sande
901a,3 der kom mir ûf daz velt gar vile
901a,4 vüre wâr ich iu daz sagen wile
901a,5 wir stâchen bî des liehtes schîne
901a,6 sô gerne dienete ich der vrouwen mîn
901a,7 bî dem liehte wir reht sehs sper
901a,8 verstâchen ich unde hêrr Rüedegêr
- 902a,1 in mîne herberge zogete ich sâr
902a,2 vûnf und drîzic vingerlîn dâ
902a,3 gap ich den vile lobelîche
902a,4 die si gedieneten ritterlîche
902a,5 hêten mit ire kunst alsô
902a,6 daz dâ ire trunzûn vlugen hôhe
902a,7 den gap ich allen vingerlîn
902a,8 mit willen ûz der hende mîn
- 903a,1 reht driu unde vierzic sper
903a,2 ich dâ verstach unhövisch ist er
903a,3 swer des jihet unde sîn sî niht
903a,4 von des hant selten ez geschihet
903a,5 dâ von er ez niht gelouben mac
903a,6 ich hête gestochen al den tac
903a,7 unz in die naht sehet daz sület ir
903a,8 vüre wâr wole gelouben mir
- 904a,1 ich hête die naht dâ guot gemacht
904a,2 des andern tages gegen Mistelbach
904a,3 ich zogete mit vröuweden alzehant
904a,4 dâ ich ouch vrouwendienest vant
904a,5 dâ wart getjostiert daz is wâr vile
904a,6 daz ich iu kürzlîche sagen wile
904a,7 ich verstach dâ zehen sper
904a,8 unde man ûf mir dâ einez mêr
- 905a,1 einlif rittern hôchgemuot
905a,2 gap ich vingerlîn diu wâren guot
905a,3 si hêten si gedienet wole
905a,4 si wâren hôhes muotes vol
905a,5 dâ mit vuor ich an mîn gemacht
905a,6 die naht was ich ze Mistelbach
905a,7 des andern tages reit ich von dannen
905a,8 mit mir vile manic biderbe man

- 906a,1 zwei hundert ritter oder mêt
906a,2 mit mir dannen riten muotes hêr .
906a,3 was vile maniger der dâ reit
906a,4 si wâren ritterlîche gekleit
906a,5 ich was ouch hôhes muotes rîche
906a,6 die strâze zogete ich vile ritterlîche
906a,7 diu gegen Velsberc dâ gie
906a,8 dâ mich der wirt vile wole entvie
- 907a,1 er was genant mîn hêrr Kadolt
907a,2 von Velsberc man was im holt
907a,3 von rehte durch sîne werdicheit
907a,4 der hôchgemuote gegen mir reit
907a,5 mit vierzic rittern lobelich
907a,6 der kleider wâren kosterîche
907a,7 von meisters handen wole gesniten
907a,8 vile ritterlîche si gegen mir riten
- 908a,1 ich wart von in entvângen dâ
908a,2 vile baz danne sît ofte anderswâ
908a,3 der wirt hiez mich mit senften siten
908a,4 des vile zûhticlîchen biten
908a,5 daz ich dâ solte mit im sîn
908a,6 er sprach “ez sol diu kûningîn
908a,7 durch zuht ezzen hier mîn brôt
908a,8 sô gerne ez ir nie wirt gebôt”
- 909a,1 ich hiez dem êre gernten sagen
909a,2 daz er der bete solte gar gedagen
909a,3 wolte ich herberge von iemanne nemen
909a,4 diu möhte mir von im wole gezemen
909a,5 daz er ez hête vûre übel niht
909a,6 ich næme die vart von niemanne niht
909a,7 gar umbe sus daz wære wâr
909a,8 alsô grôz als umbe ein hâr .
- 910a,1 er sprach “vrouwe ez sol geschehen
910a,2 ich wile iuch lâzen vrouwen sehen
910a,3 von hôher art guot unde klâr
910a,4 in wîbes zûhten wole gevar
910a,5 die sehent iuch gerne daz weiz ich wole
910a,6 gegen iu ich ir geniezen sol
910a,7 sô daz ir edeliu kûningîn
910a,8 durch si geruochet hier bî mir sîn”
- 911a,1 ich sprach “ich wile die vrouwen sehen
911a,2 vile gerne mac ez sô geschehen
911a,3 daz ir der herberge mich erlât

- 911a,4 der wile ich von iu haben rât
 911a,5 ze disen zîten daz ist alsô”
 911a,6 des wart der biderbe man unvrô
 911a,7 daz ich ez im hête sô gar verseit
 911a,8 in mîne herberge ich dô reit
- 912a,1 dâ vant ich ritterlich gemach
 912a,2 alzehant dô daz geschach
 912a,3 dô kom vûre mîne herberge dar
 912a,4 von Liechtenstein mîn hêrr Dietmâr
 912a,5 gezimiert schône in wâpenkleide
 912a,6 ez hête der biderbe an sich geleit
 912a,7 wâpenkleit vile kosterîche
 912a,8 von liechter varwe wünniclich
- 913a,1 er hielt mit ûfgerihtetem sper
 913a,2 dô kom gegen im mîn hêrr Wolvgêr
 913a,3 von Gors der kamerære mîn .
 913a,4 daz is wâr der kunde ouch niht gesîn
 913a,5 gezimiert baz denne er dâ was
 913a,6 von tiurerm manne nie munt gelas
 913a,7 danne er was daz ist gar wâr
 913a,8 des hête er êre sîniu jâr
- 914a,1 von im nie bôsheit wart vernomen
 914a,2 man sach in ritterlîchen komen
 914a,3 als einen man der tjoste gert
 914a,4 des wart ouch er dâ wole gewert
 914a,5 dô in sach komen mîn hêrr Dietmâr
 914a,6 von Liechtenstein dô nam er war
 914a,7 daz er den puneiz gegen im rite
 914a,8 sô daz sîn tjoste in niht vermite
- 915a,1 ir beider tjoste dô geriet alsô
 915a,2 daz dâ ire trunzen vlugen hôhe
 915a,3 von beiden spern wart dâ krach
 915a,4 die tjoste manic schoene vrouwe sach
 915a,5 die sâhen gerne daz rîterspil
 915a,6 swer vrouwenlop verdienen wile
 915a,7 daz muoz geschehen mit arbeit
 915a,8 in ist gemach an mannen leit
- 916a,1 von disen beiden wart geriten
 916a,2 manic schoene tjoste nâch rîtârs siten
 916a,3 dô ich ire tjoste dâ vile gesach
 916a,4 mîn munt ûz hôhem muote sprach
 916a,5 “hier mac niht mêr gemaches sîn
 916a,6 nû bringe mir her daz harnasch mîn

916a,7 ich mac ditz niht mêt an gesehen
916a,8 hier muoz ouch tjoste von mir geschehen”

917a,1 dô hiez ich an der selben stunte
917a,2 den rittern balde machen kunt
917a,3 swes lîp durch vrouwen tjoste gert
917a,4 daz er der wûrde von mir gewert
917a,5 an der stat manic biderbe man
917a,6 gegen mir sich wâpenen dô began
917a,7 mîn lîp wart ouch gezimiert sâr
917a,8 daz is wâr wole ritterlîchen dâ

918a,1 in der stat wart überal
918a,2 dô von ûzzogen grôzer schal
918a,3 wir zogeten ûf daz velt zehant
918a,4 dâ man schoenez vrouwendienest vant
918a,5 den wart gedienet dâ alsô
918a,6 daz sîn dâ maniger wart unvrô
918a,7 sîn wart ouch maniger hôchgemuot
918a,8 diu beidiu vrouwendienest tuot

919a,1 nû was ouch ûz ze velde komen
919a,2 ein ritter von dem man vernomen
919a,3 hât manige ritterlîche tât
919a,4 unde der den prîs vile ofte hât
919a,5 behalten swâ man dienen sol
919a,6 den vrouwen den dienete er sô wole
919a,7 daz er gedienete ire habedanc
919a,8 unde eteslîcher umbevanc

920a,1 hêrr Sîvrit wîse der biderbe man
920a,2 was genant der nie gewan
920a,3 decheinen zagelîchen muot
920a,4 er was vûre wâr ein ritter guot
920a,5 swâ man nâch hôhem prîse ranc
920a,6 dâ wart im ie der habedanc
920a,7 mit ritterlîcher arbeit
920a,8 hête er verdienet werdicheit

921a,1 gezimiert ûf dem velde hielt
921a,2 der biderbe man der êren wîelt
921a,3 ez hête der werde wole bekant
921a,4 ein grôzez sper in sîner hant
921a,5 dâ mit wolte er tjostierenes pflegen
921a,6 dô hête ouch ich mich tjoste bewegen
921a,7 ich unde der vile hôchgemuote man
921a,8 vile balde einander ranten an

- 922a,1 der puneiz wart envollen lanc
 922a,2 der Sîvrit wîse des hête gedanc .
 922a,3 daz er dâ nider stæche mich
 922a,4 des selben gedâhte ouch ich
 922a,5 des wart diu tjoste dâ wole geriten
 922a,6 unde vâlen beidenthalp vermiten
 922a,7 diu tjoste mit hurte alsô geschach
 922a,8 daz man dâ schilde sper bresten sach
- 923a,1 diu tjoste mit hurte alsô ergie
 923a,2 daz beide schilde unde beidiu knie
 923a,3 einander ruorten dâ ein teil
 923a,4 sô daz diu knie von smerzen meil
 923a,5 gewonnen unde die schilde sich klubten
 923a,6 die sprîzel von den scheften vlugen
 923a,7 durch beidiu kollier wart geboret
 923a,8 vile wîtiu loch mit speres orte
- 924a,1 alle die di tjoste gesehen
 924a,2 dâ hêten die hôrte man dâ jehen
 924a,3 si wære vile ritterlîche ergân
 924a,4 alzehant dô rante mich an
 924a,5 mîn hêrr Berhtolt der Rebestoc
 924a,6 des helm schilt decke unde wâpenroc
 924a,7 was geschæchet blâ unde golt
 924a,8 sîn lîp hête êren vile geholet
- 925a,1 sîn lîp was ofte umbe êre gast
 925a,2 sîn sper ûf mînem helme brast
 925a,3 sô daz der helm lûte erklanc
 925a,4 der tjoste muoste man im wizzen danc
 925a,5 ouch vuorte der hôchgemuote man
 925a,6 mîn sper in sînem schilde danne
 925a,7 dâ schilt unde helme zesamene gie
 925a,8 mîn sper dâ in dem schilde hiew
- 926a,1 dâr nâch verstach ich zweinzic sper
 926a,2 vile ritterlîche unde einez mêt
 926a,3 daz eine alsô verstoehen wart
 926a,4 daz sîn schoene tjostlich vart
 926a,5 dâ schaden tet ich sage iu wie
 926a,6 dâ mit ein schoeniu tjoste ergie
 926a,7 die ich iedoch niht gerne sach
 926a,8 nû merket reht wie diu geschach
- 927a,1 ich hête in mîne hant genomen
 927a,2 ein starkez sper dô sach ich kômen
 927a,3 von Burstendorf hêrrn Ruodbreht

- 927a,4 gegen mir her dô was mîn reht
 927a,5 daz ich ouch tribe gegen im dar
 927a,6 ich stach im durch sîn harnasch gar
 927a,7 unde durch den hals die lanzen mîn
 927a,8 dâ von sîn lîp muoste vallente sîn
- 928a,1 hinder daz ors er verre viel
 928a,2 daz bluot ûz sîner wunden wiel
 928a,3 sô daz daz gras wart vaste rôt
 928a,4 man wânte des wole daz er wær tôt
 928a,5 daz was mir herzenlîchen leit
 928a,6 von leide ich abe dem velde reit
 928a,7 in die herberge trûriclich
 928a,8 mîn lîp was unmuotes rîche .
- 929a,1 iedoch genas der biderbe man
 929a,2 des andern morgenes vruo von dannen
 929a,3 wolte ich vile gerne sîn geriten
 929a,4 dô hiez mich zûhticlîchen biten
 929a,5 der wirt des lîp ie êre holete
 929a,6 von Velsberc mîn hêrr Kadolt
 929a,7 daz ich dâ sehe durch hōvischen muot
 929a,8 sîn wîp unde manic vrouwen guot
- 930a,1 ich sprach “daz sol durch in geschehen
 930a,2 ich wile die vrouwen gerne sehen
 930a,3 ez muoz durch zuht mir wole gezemen
 930a,4 ich wile hiute messe bî in vernemen”
 930a,5 des wart der bote von herzen vrô
 930a,6 alzehant er sagete dô
 930a,7 dem wirte daz ich wolte dar
 930a,8 des vrōuweten sich die vrouwen gar
- 931a,1 ez wart von in manic schoene kleit
 931a,2 gegen mir ze vlîze sâr an geleit
 931a,3 dô kleite ouch mich schône dâ
 931a,4 unde reit in hôhem muote sâr
 931a,5 ûf die burc dâ entvie man mich
 931a,6 williclîche des dankete ouch ich
 931a,7 mit zûhten als daz schône zam
 931a,8 ire gruoze ich williclîche vernam
- 932a,1 der wirt mich dâ vile wole entvie
 932a,2 sîn wîp diu hûsvrouwe dâ gein mir gie
 932a,3 mit vrouwen vile ein stiege ze tal .
 932a,4 der kleider vielen manigen val
 932a,5 abe der stiege her nâch dem trite
 932a,6 ire guot gebende ire senfter site

- 932a,7 unde ouch ire minniclicher schîn
932a,8 tet mir wole in dem herzen mîn
- 933a,1 dô ich si sach her gegen mir gên
933a,2 ich wolte durch zuht niht langer stên
933a,3 ich gie vile blîde gegen in dar
933a,4 des smielten al die vrouwen gar
933a,5 daz ich ez alsô blîde an vie
933a,6 unde ouch in wîbes kleidern gie
933a,7 unde alsô schoene zöpfe truoc
933a,8 des wart gelachet dâ genuoc
- 934a,1 diu hûsvrouwe sprach “vrouwe kûningîn
934a,2 ir sûlet mir willekomen sîn”
934a,3 des neic ich ir mit zûhten dâ
934a,4 die vrouwen gar mich gruozen sâr
934a,5 ir einer ich mîn kûssen bôt
934a,6 diu wart dâ von gar rôsenrôt
934a,7 einer andern ich ez dô truoc
934a,8 diu wart vore schame ouch rôten genuoc
- 935a,1 diu hûsvrouwe nam mich bî der hant
935a,2 si wîste mich von dannen zehant
935a,3 in eine kîrchen wole getân
935a,4 ein schoene messe huop man dô an
935a,5 die man dâ gote ze êren sanc
935a,6 bî mir von vrouwen was gedranc
935a,7 vûre wâr ich iu daz sagen wile
935a,8 gote wart gedienet dâ niht vile .
- 936a,1 mich hête dâ nâch der minne stric
936a,2 gevangen unde manic sûezer blic
936a,3 der dâ von liechten ougen gie
936a,4 daz mich diu minne dâ niht vie
936a,5 daz wande niht wan diu stæte mîn
936a,6 solte ich gevangen iemer sîn
936a,7 daz hête ein vrouwe aldâ getân
936a,8 hête mich mîn stæte si vâhen lân
- 937a,1 der guot gebærde ire liechter schîn
937a,2 brach vaste durch diu ougen mîn
937a,3 mir unz in des herzen grunt
937a,4 ire rôsenvarwen rôten munt
937a,5 dô ich den gegen mir lachen sach
937a,6 unde er gegen mir sô suoze sprach
937a,7 unde wære mîn stæte mir dô niht komen
937a,8 si hête die sinne mir benomen

938a,1 dô ich si an von herzen sach
 938a,2 diu stæte mîn sâr zuo mir sprach
 938a,3 “wie nû wie nû waz sol daz sîn
 938a,4 wem wile dû lân di vrouwen dîn
 938a,5 an der nâch gote dîn leben stât
 938a,6 unde diu vile manige tugende hât
 938a,7 tuo hin dîn muot ist gar enwiht
 938a,8 ich gestate dir solicher dinge niht”

939a,1 dô mîn stæte mich strâfete alsô
 939a,2 daz herze mîn wart gar unvrô
 939a,3 daz mir der wanc was dâ geschehen
 939a,4 ich gedâhte “ich wile niht mêr an sehen
 939a,5 ditze wünnicliche wîp
 939a,6 si hât sô minniclichen lîp
 939a,7 wolte ich si lange sehen an
 939a,8 des müeste mîn stæte schaden hân”

940a,1 ich warf diu ougen sâr von ir
 940a,2 unde gedâhte vile herzenlichen mir
 940a,3 “jâ hêre wes hête ich gedâht
 940a,4 hête mich alsô in zwîvel brâht
 940a,5 dirre vrouwen liechter schîn
 940a,6 gegen der vile lieben vrouwen mîn
 940a,7 sô wære unbilede an mir geschehen
 940a,8 ich wile si sô vaste niht mêr an sehen

941a,1 dâ sint mîn ougen schuldic an
 941a,2 dô si mich sach sô guotliche an
 941a,3 unde ich erblickete ire rôten munt
 941a,4 diu ougen mîn sâr an der stunt
 941a,5 sâr liezen ire vile liechten schîn
 941a,6 enmitten in daz herze mîn
 941a,7 nû en ruoche des sol niht mêr geschehen
 941a,8 ich lâze ez niht mêr sô vrîliche sehen

942a,1 ich sihe wole wolte volgente sîn
 942a,2 mîn herze nâch den ougen mîn
 942a,3 si rieten im vilelîhte daz
 942a,4 dâ von ich iemer muoste haz
 942a,5 in beiden an mîn ende tragen
 942a,6 wie solte ich hôhen lôn bejagen
 942a,7 wolte ich den ougen volgen nâch
 942a,8 sît in mit sehenne ist sô gâch”

943a,1 mîn lîp hier in gedanken stuont
 943a,2 gar sinnelôs als die tuont
 943a,3 die an diu wîp verdenkent sich

- 943a,4 als hête ouch ich verdâht dâ mich
 943a,5 daz ich niht weste wâ ich was
 943a,6 biz daz man daz êwangêli las
 943a,7 dô daz ein ander pfaffe huop an
 943a,8 dâ von allrêrest ich mich versan
- 944a,1 man sach dâ manic schoene vrouwen stên
 944a,2 dô ich ze dem opfer wolte gên
 944a,3 die hûsvrouwen hiez ich vûre mich gân
 944a,4 si sprach “des sulet ir mich erlân
 944a,5 war koemen danne die zûhte mîn
 944a,6 gienge ich vore einer kûningîn
 944a,7 daz wære an êren mir niht guot
 944a,8 ir sûlet sîn haben decheinen muot”
- 945a,1 ich gie ze dem opfer schône sâr
 945a,2 nâch mir gie vile manic vrouwe dare
 945a,3 daz ich den ganc sô blîde an vie
 945a,4 des wart gelachet dort unde hier
 945a,5 mîn nîgen unde mîn umbeswanc
 945a,6 diu wurden dâ envollen lanc
 945a,7 ich gie nâch blîder vrouwen site
 945a,8 kûme hendebreit was dâ mîn trit
- 946a,1 swie seine ich gie swie sanfte ich trat
 946a,2 ich kom doch wider an die stat
 946a,3 dâ êr gestanten was mîn lîp
 946a,4 bî mir stuont dâ manic schoene wîp
 946a,5 die wâren minniclîche gevar
 946a,6 dô truoc man mir daz pæce dar
 946a,7 an einem buoche daz was guot
 946a,8 daz nam ich als manic vrouwe tuot
- 947a,1 dô ich daz pæce aldâ entvie
 947a,2 ich bôt ez dort ich bôt ez hier
 947a,3 ich bôt ez dâ manic vrouwen an
 947a,4 der ez decheiniu wolte envâhen
 947a,5 ich bôt ez der schoenen williclîche
 947a,6 dô sprach diu reine tugende rîche
 947a,7 “ir sûlet des pæces mich erlân
 947a,8 sît man iuch hât vûre einen man”
- 948a,1 diu messe dô schier endete sich
 948a,2 dô sach man urloubes gerne mich
 948a,3 der wirt unde ouch diu hûsvrouwe sâr
 948a,4 die bâten mich enbîzen dâ
 948a,5 ich sprach “ich wolte iuch gerne geweren
 948a,6 sît ich es iuch sihe mit zûhten gerne

- 948a,7 wan daz ez hât diu stæte mîn
 948a,8 verlobet dâ von mac ez niht sîn”
- 949a,1 ich sprach “ich hân sô dise vart
 949a,2 gevarn daz ich daz hân bewart
 949a,3 daz mir habe ieman iht gegeben
 949a,4 wan si der ich wile iemer leben
 949a,5 diu hât mir gegeben hôhen muot
 949a,6 si ist mir vûre ungemüete guot
 949a,7 von ir mîn muot vile hôhe stât
 949a,8 dâ von si mînen dienst hât”
- 950a,1 dô nam ich urloup an der stunt
 950a,2 mich segnete dâ manic süezer munt
 950a,3 si sprâchen alle “vrouwe künigin
 950a,4 got lâze iuch iemer sælic sîn
 950a,5 swar iuwer lîp von hinnen var
 950a,6 daz iuch der rîche Krist bewar”
 950a,7 sus schiet ich von den vrouwen danne
 950a,8 reht als ein hôchgemuoter man
- 951a,1 dô reit ich in die herberge mîn
 951a,2 unde sande den rittern vingerlîn
 951a,3 der trunzen man ze velde vant
 951a,4 unde der tjoste hête sper verswant
 951a,5 der wâren zweinzic daz ist wâr
 951a,6 zwei unde zweinzic sper ich gar
 951a,7 aldâ verstach daz ist alsô
 951a,8 mîn lîp was mînes gelückes vrô
- 952a,1 mîn lîp dâ kürzlîche wole enbeiz
 952a,2 dâr nâch ich mich mit willen vleiz
 952a,3 daz ich dô schône rite von dannen .
 952a,4 ein niuwe kappen leite ich an
 952a,5 dâr zuo ein niuwez röckelîn
 952a,6 dô bat ich daz gesinde mîn
 952a,7 daz si schône riten durch die stat
 952a,8 si tâten reht als ich si bat
- 953a,1 über die Thye zogete ich zehant
 953a,2 mit vrôuweden in der Bêheim lant
 953a,3 dâ stuont ein ouwe wünniclîche
 953a,4 dâr in reit ich vile muotes rîche
 953a,5 unde hiez dâ offenbære sagen
 953a,6 swer dâ wolte prîs durch wîp bejagen
 953a,7 daz der vile balde wâpenete sich
 953a,8 dô wâpenete ouch ich balde mich

954a,1 diu mînen wîzen wâpenkleit
 954a,2 hête ich dâ schier an mich geleit
 954a,3 unde stapfete gezimiert vûre daz holz
 954a,4 dâ mich bestuont ein ritter stolz
 954a,5 von schoenen kirechen Otte er hiez
 954a,6 der biderbe man des niht liez
 954a,7 dô er mich sach sus gegen im komen
 954a,8 ez würde sîn ors mit sporen genomen

955a,1 daz treip er vaste gegen mir her
 955a,2 er vuorte ein wole gewahsen sper
 955a,3 daz sluoc er under den armen sîn
 955a,4 als tet ouch ich zehant daz mîn
 955a,5 von beiden spern wart dâ krach
 955a,6 die trunzen man vaste stecken sach
 955a,7 in den schilden dort unde hier
 955a,8 diu tjoste vile ritterlîche ergie

956a,1 der ritter was ze velde komen
 956a,2 wole hundert als ich hân vernomen
 956a,3 gezimiert alle ritterlîche
 956a,4 “wîch â hêre wîch â wîch
 956a,5 lât hier tjostieren durch diu wîp
 956a,6 vile manigen biderben ritters lîp”
 956a,7 si gâheten vaste her gegen mir
 956a,8 dô hête ouch ich ze tjoste gire

957a,1 ich gerte alsam ein vederspîl
 957a,2 der ritter kom dâ gegen mir vile
 957a,3 ich hête durch vrouwen tjoste gire
 957a,4 des wart dâ wole gebüezet mir
 957a,5 ire herze hête ouch ze tjoste ger
 957a,6 si triben vaste gegen mir her
 957a,7 vile ofte ir drî dâ gegen mir riten
 957a,8 daz wær durch zuht baz vermiten

958a,1 des tages manic tjoste geschach
 958a,2 gegen mir daz ich si nie gesach
 958a,3 daz ir drî ofte gegen mir riten
 958a,4 daz kom dâ von die biderben striten
 958a,5 vile vaste umbe die tjoste gein mir
 958a,6 ez wart des tages vile manic banier
 958a,7 ûf mir enzwei gestochen sô
 958a,8 daz dâ ire trunzen vlugen hôhe

959a,1 dô ich dâ vûnvzehen sper verstach
 959a,2 dô kam der voget von Lengenbach
 959a,3 der tuomvoget sô was er genant

- 959a,4 von sînen tugenden wîte erkant
959a,5 er kom vile schône gegen mir her
959a,6 unser ietwederer dâ sîn sper
959a,7 verstach vile ritterlîchen wole
959a,8 der tuomvoget der was tugende vol
- 960a,1 daz wart in manigen landen schîn
960a,2 dô er verstach dâ daz sper sîn
960a,3 den helm er zehant abe bant
960a,4 er reit dâ er mich haltente vant
960a,5 ich hielt mit ûf geworfenem sper
960a,6 er sprach “ich state iu ditz niht mêr
960a,7 nieman sô starken lîp getruoc
960a,8 er hête gestochen nû genuoc”
- 961a,1 er zoumte mich bî dem zoume danne
961a,2 den bat ich mir vile ofte lân
961a,3 “ich en lâze ez iu niht” sô sprach er
961a,4 er brach mir ûz der hant daz sper
961a,5 er sprach “vile edeliu kûningîn
961a,6 ir sület iuwer tjostieren lâzen sîn
961a,7 durch iuwer vrouwen ich iuch bite”
961a,8 dô liez ich ez mit senftem site
- 962a,1 den schilt gap ich dô von der hant
962a,2 den helm ich von dem houbete bant
962a,3 den stûchen von dem röckelîne
962a,4 warf ich dâ über daz houbet mîn
962a,5 dâr durch ich doch vile wole gesach
962a,6 swâ ûf dem velde dâ tjoste geschach
962a,7 dâ wart manic schoene tjoste geriten
962a,8 mit kunst nâch ritterlîchen siten
- 963a,1 man hôrte dâ allenthalben krach
963a,2 von grôzen spern daz geschach
963a,3 dâ ruofte vile maniger “her â her”
963a,4 dâ vorderte ouch vile maniger sper
963a,5 die helme man dâ vaste bant
963a,6 dâ nam manic ritter schilt zehant
963a,7 sus wurden si umbe werdicheit
963a,8 mit ritterlîcher arbeit
- 964a,1 vüre wâr ich iu daz sagen wile
964a,2 sper schilde helme gelac dâ vile
964a,3 ûf dem velde hier unde dort
964a,4 wart loch durch helm mit tjoste geboret
964a,5 von der edelen ritter hant
964a,6 eteslîchen tjostierær man vant

- 964a,7 gevallen ûf daz grüne gras
 964a,8 der des vile ungewon êr was
- 965a,1 ich wæne wole den wære daz leit
 965a,2 wan swâ der man umbe werdicheit
 965a,3 wirbet unde im missegât
 965a,4 des hôchgemüete ein ende hât
 965a,5 swem wole gelinget der ist vrô
 965a,6 umbe ritterschaft stât ez alsô
 965a,7 hiute liebe morgen leit
 965a,8 diu beidiu sint in bereit
- 966a,1 dô man dâ vile vore mir gestach
 966a,2 der tuomvoget sâr dô zuo mir sprach
 966a,3 “vrouwe vile edeliu künigîn
 966a,4 ir sület niht langer bî uns sîn
 966a,5 sît iuwer vart ist wole volbrâht
 966a,6 sô vart reht als ir habet gedâht
 966a,7 lât iuwer gesinde mit mir varn
 966a,8 daz wile ich iu vile wole bewarn”
- 967a,1 ich vuor als mir der biderbe riet
 967a,2 ich sage iu wie ich dannen schiet
 967a,3 ich gap dâ niunzehen vingerlîn hin
 967a,4 dâr nâch zogete der lîp mîn
 967a,5 in daz holz dâ entwâpenete ich
 967a,6 daz is wâr vile snellichen mich
 967a,7 von mînem gesinde ich urloup nam
 967a,8 vile minnicliche als mir daz zam
- 968a,1 verholene reit ich sâr von dannen
 968a,2 mit mir reit nieman wan ein man
 968a,3 der was des tuomvogetes kneht
 968a,4 er was mir holt mit triuwen sleht
 968a,5 er hiez von Vrônhoven Kol
 968a,6 er kunde die strâze gar alle wole
 968a,7 gegen Wîenen durch daz lant
 968a,8 die wâren im alle wole bekant
- 969a,1 vile balde ich hin ze Wîenen quam
 969a,2 ein herberge ich verholene nam
 969a,3 dâr inne was ich drî tage
 969a,4 nû merket reht waz ich iu sage
 969a,5 in der zît wart mir bereit
 969a,6 vûnvzic rittern wâpenkleit
 969a,7 gesniten daz is wâr meisterliche
 969a,8 si wâren hôher koste rîche

970a,1 dô ich mich hier bereitente lac
 970a,2 nû hoeret wes mîn gesinde pflac
 970a,3 dô ich dort kom von in geriten
 970a,4 mîn kamerære mit hövischen siten
 970a,5 nam alzehant diu driu pferde mîn
 970a,6 kappen unde diu röckelîn .
 970a,7 ûf diu pferde er ez sâr leite
 970a,8 unde swaz dâr zuo hôrte vrouwenkleide

971a,1 ûz der ouwe er ez vuorte zehant
 971a,2 hin dâ er manigen ritter vant
 971a,3 die riten schône gegen im dar
 971a,4 unde nâmen mîn dâ alle war
 971a,5 dô mich dâ ir decheiner vant
 971a,6 unde daz si sâhen mîn gewant
 971a,7 dâ ligen ûf den pferden mîn
 971a,8 si sprâchen “wâr ist diu künigîn

972a,1 war ist si komen jâ hêrre war”
 972a,2 die ritter kômen alle dar
 972a,3 dâ sprach der kamerære mîn
 972a,4 “ez hât mîn vrouwe diu künigîn
 972a,5 daz is wâr vile übel an mir getân
 972a,6 si hât mich alsô hier verlân
 972a,7 daz ich niht weiz war si ist komen
 972a,8 des ist mir vröuweden vile benomen

973a,1 disiu pfert unde disiu kleit
 973a,2 hât si hier gelân daz ist mir leit
 973a,3 ich ne weiz waz ich hier mit tuo
 973a,4 dâ sulet ir alle râten zuo
 973a,5 vüer ich ez von hinnen daz ist missetân
 973a,6 sol aber ich ez hier verlân
 973a,7 sô râtet wem oder wie
 973a,8 des volge ich iu gar allez hier”

974a,1 dô sprach der tuomvoget hôchgemuot
 974a,2 “knappe kluoc mich dunket guot
 974a,3 daz ir ez hier den varnten gebet
 974a,4 unde schône in hôhem muote lebet
 974a,5 iuwer vrouwe wole ander guot bejaget
 974a,6 ist si sô rîche als man uns saget
 974a,7 unde als man an ire koste sihet
 974a,8 sô schadet ir diu gâbe niht”

1522a,1 von Missouwe der biderbe man
 1522a,2 vuorte alsolich zimierde an
 1522a,3 daz sîn dem keiser wær genuoc

1522a,4 ûf sînem helme der biderbe truoc
 1522a,5 einen kranz von gansvedern grôz unde wîz .
 1522a,6 sîn helme geworht wole mit vlîze
 1522a,7 sîn schilt was gar von golde rôt
 1522a,8 als im sîn hôher muot gebôt

1523a,1 dâr ûf ein einhürne zobelvar
 1523a,2 sîn wâpenroc sîn decke gar
 1523a,3 wâren vile guot baldekîne
 1523a,4 dâr ûf sach man gestrôuwet ouch sîn
 1523a,5 einhürne vile nâch zobelvar
 1523a,6 sîn banier was gevar vûre wâr
 1523a,7 rehte dem schilde gelîche getân
 1523a,8 sus kom dort her der biderbe man

1524a,1 dô kom gegen im dâ hêrr Gâwân
 1524a,2 von Liechtenstein der vuorte ouch an
 1524a,3 gezimier daz gap liechten schîn
 1524a,4 der vuorte ûf dem helme sîn
 1524a,5 ein wæl von golde geortert wole
 1524a,6 ieteslich ort pfâwenesvedern vol
 1524a,7 bewunden was in koste wîse
 1524a,8 der werde hête vile hôhen prîs

1525a,1 der biderbe was der bruoder mîn
 1525a,2 des vuorte er vûre wâr den schilt sîn
 1525a,3 dem mînen reht gelîche gevar
 1525a,4 der schilt was wîz zwô swarze bar
 1525a,5 schipfes nâch dem swerte ze tal
 1525a,6 dâr ûf ein buckel von golde wal
 1525a,7 was gemachet meisterlîche .
 1525a,8 sus vuorte den schilt der muotes rîche

1526a,1 sîn wâpenroc sîn decke was
 1526a,2 von samîte grüne alsam ein gras
 1526a,3 dâr ûf der schilde vile gestrôuwet
 1526a,4 der hôchgemuot sich vaste vrôuwete
 1526a,5 eines starken spers daz er vuorte
 1526a,6 daz ors mit sporen er vaste ruorte
 1526a,7 sîn puneiz wart envollen lanc
 1526a,8 nâch vrouwenlône der biderbe ranc

1527a,1 dô kom ouch ritterlîchen her
 1527a,2 hêrr Otte von Missouwe beidiu sper
 1527a,3 wurden dâ enzwei geriten
 1527a,4 mit kunst nâch ritterlîchen siten
 1527a,5 an beiden helsen daz geschach
 1527a,6 die trunzen man ûf vliegen sach

- 1527a,7 diu tjoste muoste dâ dunken guot
1527a,8 vile manigen ritter hôhgemuot
- 1528a,1 dâr nâch kom in den rinc gerant
1528a,2 gezimiert schône sâr zehant
1528a,3 ahtzehen ritter ritterlîche
1528a,4 “wîch â hêrre wîch â wîch
1528a,5 wîchet lât tjostierenes pflegen”
1528a,6 dâ hête ouch sich der tjoste bewegen
1528a,7 in hôhem muote an der stete
1528a,8 von Spiegelberc hêrr Lanzilet
- 1529a,1 von Lantesêre hêrr Iwân
1529a,2 hêrr Lanzilet unde hêrr Gâwân
1529a,3 die tâten ez des âbendes sô
1529a,4 dâ von ire lop muoste stîgen hôhe
1529a,5 si werten den rinc daz ist wâr
1529a,6 den âbent al den ritteren gar
1529a,7 dâ wart manic schoene tjoste geriten
1529a,8 sus unde sô nâch ritters siten
- 1530a,1 daz triben si biz daz diu naht
1530a,2 den tac vertreip dâ mit ire maht
1530a,3 dâ muosten wir rûmen dâ daz velt
1530a,4 wir vuoren sâr in diu gezelt
1530a,5 di andern vuoren in die stat
1530a,6 ûz hôhem muote ich si dô bat
1530a,7 daz si des morgenes kômen vruo
1530a,8 daz lobeten si mit willen dô
- 1531a,1 hêrr Kadolt wîse der sprach dô
1531a,2 vile gar verholene zuo mir sô
1531a,3 “kûninc Artûs ir sulet mich weren
1531a,4 des ich durch dienst wile an iuch gern
1531a,5 daz ir mit mir iuwer êrstez sper
1531a,6 morgen hier verstechet daz ist mîn ger
1531a,7 ir sûlet mich des geniezen lân
1531a,8 daz iu mîn dienst ist undertân”
- 1532a,1 ich sprach “hêrr wîse ir sît sô wert
1532a,2 swes ir mit bete hier an mich gert
1532a,3 des solte ich iuch vile gerne biten
1532a,4 ir habet sô vile durch êre erliten
1532a,5 daz ich iuch morgen mit den spern
1532a,6 des êrsten wile bestân vile gerne .
1532a,7 nû komet ot vruo daz ist mîn bete”
1532a,8 sus schiet er von mir an der stete

1533a,1 diu naht gemechlîche ende nam
1533a,2 sâr dô der ander tac bequam
1533a,3 ein schoene messe man dô sanc
1533a,4 ze êren gote . dâr nâch unlange
1533a,5 sach man den wîsen zogen her
1533a,6 man vuorte im mite manic starkez sper
1533a,7 gezimiert was der biderbe man
1533a,8 als ich iu wole gesagen kan

1534a,1 sîn helm was lieht alsam ein glas
1534a,2 dâr umbe von drîzehen vedern was
1534a,3 gestôzen ein vile wîter kranz .
1534a,4 mit silberbletern glanz
1534a,5 was gemachet dâr an vile
1534a,6 gebunden was an ieteslich kil
1534a,7 von pfâwenesvedern ein koste grôz
1534a,8 sus vuorte den helm der schanden blôz

1535a,1 sîn schilt was swarz nâch zobel var
1535a,2 dâr ûf ein lewe von silber gar
1535a,3 was geslagen meisterlîche
1535a,4 des krône was von golde rîche
1535a,5 diu lac gar edeler steine vol
1535a,6 ein samît – swarz alsam ein kole
1535a,7 was sîn wâpenroc vûre wâr
1535a,8 gehouwen meisterlîchen gar

1536a,1 lewen von silber was dâr ûf vile
1536a,2 gestrôuwet vûre wâr ich iu daz wile
1536a,3 sagen diu decke was sam gevar
1536a,4 unde ouch vile wole gehouwen gar
1536a,5 der biderbe vuorte ein starkez sper
1536a,6 dâr an ein banier gein mir her
1536a,7 diu was alsam sîn schilt getân
1536a,8 sus kom gein mir der biderbe man

1537a,1 ich sage iu daz dâ mit im reit
1537a,2 der êren bote diu schoene meit
1537a,3 si hête im in die hant gegeben
1537a,4 die banier guot er dienete sîn leben
1537a,5 den vrouwen umbe ire habedanc
1537a,6 wart im niht sûezer umbevanc
1537a,7 daz was von vrouwen missetân
1537a,8 wan er nie valsch gein in gewan

1538a,1 ir sûlet vûre wâr gelouben daz
1538a,2 wole . sibenzic ritter oder baz
1538a,3 riten gezimiert mit im her

1538a,4 den vuorte man mit manic starkez sper
1538a,5 dô was ouch ich in den rinc bekommen
1538a,6 ein starkez sper ich hête genomen .
1538a,7 ich was aldâ gezimiert sô
1538a,8 daz man mîn was ze sehenne vrô

1539a,1 nû hête ouch sich vaste vûre genomen
1539a,2 hêrr Kadolt wîse man sach uns komen
1539a,3 mit der tjoste zesamene sô
1539a,4 daz dâ die trunzen vlugen hôhe
1539a,5 ich stach im von dem halse sîn
1539a,6 daz kollier . daz der helm mîn .
1539a,7 von sîner tjoste vile lûte erklanc
1539a,8 der tjoste muoste man mir wizzen danc

1540a,1 diu tjoste sô nâhen wart geriten
1540a,2 daz nieman wânte daz vermiten
1540a,3 wær dâ diu hurt der schilde stôz
1540a,4 wart von uns beiden dâ sô grôz
1540a,5 daz ez über al daz velt erhal
1540a,6 diu tjoste was dâ geriten wole
1540a,7 man hôrte vûre wâr di biderben jehen
1540a,8 daz schoener tjoste nie wart gesehen

1541a,1 dô nam ich sâr ein ander sper
1541a,2 dô reit gegen mir vile balde her
1541a,3 der êren bote diu schoene maget
1541a,4 si sprach zuo mir “iu sî gesaget
1541a,5 der wîse mac niht gestechen mêr
1541a,6 im tuot diu zeswîu hant vile wê
1541a,7 sîn dûme ist im ûz dem lide sîn
1541a,8 daz habet vûre wâr küninc hêrre mîn”

1542a,1 ich sprach “nû wizzet schoeniu meit
1542a,2 ez ist mir herzenlîchen leit”
1542a,3 dâ mit reit ich vûrebaz
1542a,4 vaste in den rinc geloubet daz
1542a,5 dâ mich bestuont manic biderbe man
1542a,6 von den wart ez dâ wole getân
1542a,7 vile trunzen man ûf vliegen sach
1542a,8 mit tjoste man starkiu sper zerbrach

1543a,1 ob ich si iu nante gar sunderlîche
1543a,2 di mit mir dâ vile ritterlîche
1543a,3 stâchen der diuhte iuch ze vile
1543a,4 dâ von ich ez verswîgen wile
1543a,5 ich tet ot swaz ich mohte dâ
1543a,6 dô riten zuo mir balde sâr

1543a,7 hêrr Parzivâl . unde hêrr Gâwân
1543a,8 hêrr Iwân unde ouch hêrr Tristram

1544a,1 ieteslîcher sprach dô “hêrre mîn
1544a,2 wie nû wie waz sol daz sîn
1544a,3 sol nieman stechen hier wan ir
1544a,4 sô saget uns reht wâr umbe wir
1544a,5 sîn mit iu bekomen her
1544a,6 wellt ir verstechen gar diu sper
1544a,7 aleine daz ist missetân
1544a,8 ir sület uns ouch stechen lân”

1545a,1 si brâchen mir dô sâr zehant
1545a,2 den schilt in zorne von der hant
1545a,3 unde bunden mir den helm abe
1545a,4 mit zorniclîcher ungehabe
1545a,5 unde sprâchen “küninc iu sî geseit
1545a,6 ez sî iu liep oder ez sî iu leit
1545a,7 jâ verstechet ir tâlanc mêt
1545a,8 mit iuwer hant vûre wâr kein sper”

1546a,1 ich sprach “ich wile ez gerne lân
1546a,2 sô bindet helme ûf hêrr Tristram
1546a,3 hêrr Parzivâl unde hêrr Ruother
1546a,4 ich weiz wole ir bestüendet ein her
1546a,5 doch nemet zuo iu hêrrn Lanzilet
1546a,6 unde hêrrn Erec daz ist mîn bete
1546a,7 daz Segrामurs ouch mit iu var
1546a,8 ich wile daz iuch sehse got bewar”

1547a,1 des urloubes wâren si hôchgemuot
1547a,2 wan ire muot was ûf êre guot
1547a,3 di helme bunden si ûf zehant
1547a,4 hei waz man schoener tjoste vant
1547a,5 man hôrte dâ niht wan krach â krach
1547a,6 manic ritterlich tjoste geschach
1547a,7 ûf dem velde dort unde hier
1547a,8 hurtâ hurtâ wie ez dâ gie

1548a,1 von Tulbinge mîn hêrr Erec
1548a,2 was vûre wâr dâ des tages quec
1548a,3 er tet ez mit dem lîbe alsô
1548a,4 dâ von sîn lop muoste stîgen hôhe
1548a,5 er verstach vûnvzehen sper
1548a,6 des tages dâ unde vûre wâr mêt
1548a,7 des tages dâ der êren gernte man .
1548a,8 von rehte der biderben lop gewan

- 1549a,1 hêrr Segramurs von Arnstein
 1549a,2 verstach dâ sper vile gar unkleine
 1549a,3 si wâren volliclichen grôz
 1549a,4 des er an maniger tjoste genôz
 1549a,5 wan man dâ von im gerne reit
 1549a,6 vile willicliche man in meit
 1549a,7 vüre wâr ich iu daz sagen wile
 1549a,8 daz er doch swande waldes vile
- 1550a,1 hêrr Lanzilet von Spiegelberc
 1550a,2 der tet dâ vile ritterlîchiu werc
 1550a,3 er was ein ritter hôchgemuot
 1550a,4 des wart manic tjoste dâ von im guot
 1550a,5 er was der vrouwen dienstman
 1550a,6 des hête er ez ofte wole getân
 1550a,7 des tages unmüezic man in sach
 1550a,8 sîn hant vile starker sper verstach
- 1551a,1 von LÉbenberc mîn hêrr Tristram
 1551a,2 des tages mit arbeit lop gewan
 1551a,3 ir sulet vüre wâr gelouben daz
 1551a,4 ez tet des tages dâ nieman baz
 1551a,5 er schiuhte weder jenen noch disen
 1551a,6 unde wærn ez alle gewesen risen
 1551a,7 er hête si aleine wole bestân
 1551a,8 dem tet gelîche der biderbe man
- 1552a,1 von Lindeniz der vile werde Îther
 1552a,2 hête ein hant diu hiez sperverzer
 1552a,3 des tages der sper si vile verzert
 1552a,4 wan er den rinc mit tjoste wert
 1552a,5 ein ritter der hiez hêrr Reinbôt
 1552a,6 von Metters der muoste lîden spot
 1552a,7 in stach dâ nider hêrr Ither
 1552a,8 mit einer tjoste gar sunder wer
- 1553a,1 von Lüenz mîn hêrr Parzivâl
 1553a,2 dâ swande sper vile âne zal
 1553a,3 dem biderben was nâch êren wê
 1553a,4 er eine verstach dâ sper noch mêr
 1553a,5 danne ie dechein ritter dâ verstach
 1553a,6 des muoste er lîden ungemach
 1553a,7 sîn ungemach im êre holete
 1553a,8 im wâren di biderben alle holt
- 1554a,1 ez stach der biderbe êrenrîche
 1554a,2 einen ritter dâ nider der hiez Dietrîch
 1554a,3 von Smida sô was er genant

- 1554a,4 den stach dâ nider sîn zeswiu hant
1554a,5 daz er gar sinnelôs gelac
1554a,6 biz an den âbend al den tac
1554a,7 daz was doch sînen vriunden leit
1554a,8 von den wart ez vile schiere verkleit
- 1555a,1 die sehse di ich hier hân genant
1555a,2 di wurden ofte dâ an gerant
1555a,3 dâ was vile manic biderbe man .
1555a,4 des wurden ofte si bestân
1555a,5 des werten sich di biderben sô
1555a,6 daz dâ ire lop muoste stîgen hôhe
1555a,7 dâ wart manic schoene tjoste geriten
1555a,8 unde vile manic harnaschrinc versniten
- 1556a,1 diu ritterschaft werte al den tac
1556a,2 manic helm unde kollier dâ gelac
1556a,3 ûf der erde herrenlôs
1556a,4 den schilt vile maniger dâ verlôs
1556a,5 daz man im in stach verre von der hant
1556a,6 zerbrosten nider ûf daz lant
1556a,7 dâ lac vile schîben unde sper
1556a,8 dâ ûf dem velde hin unde her
- 1557a,1 ir sûlet vûre wâr gelouben daz
1557a,2 wole sibenzic ritter oder baz
1557a,3 stâchen mit den sehsen dâ
1557a,4 ouch hân sît selten anderswâ
1557a,5 vûre wâr ich iu daz sagen wile
1557a,6 sehs ritter starker sper sô vile
1557a,7 verstoichen als von in geschach
1557a,8 ire hant wole hundert sper verstach
- 1558a,1 dô sach ich daz gedranc an gie
1558a,2 die sehse mit tjoste dort unde hier
1558a,3 des mohte ich langer niht vertragen
1558a,4 dô hiez ich snellîchen sagen
1558a,5 von Liechtenstein hêrr Gâwân
1558a,6 von Lantesêre hêrr Iwân
1558a,7 daz si dar koemen ûf den rinc
1558a,8 daz gebot was in ein liebe gedinge
- 1559a,1 si entblienden ez ire handen dâ
1559a,2 daz is wâr vile ritterlîchen sâr
1559a,3 ir beider muot nâch êren ranc
1559a,4 man hôrte von in dâ helmklanc
1559a,5 unde manigen schoenen schildes stôz
1559a,6 der spere krachen wart dâ grôz

- 1559a,7 von tjoste die schilde sich klubten
1559a,8 daz sprîzel ofte hôhe vlugen
- 1560a,1 daz spere krachen was dâ grôz
1560a,2 holrefloiten sumberdôz
1560a,3 busûne unde schalmîen schal
1560a,4 mohte nieman dâ gehoeren wole
1560a,5 der tjoste man dâ gar wole vant
1560a,6 swelich ritter dâ den helm abe bant
1560a,7 des beitete man niht mit tjoste dâ
1560a,8 als man tuot ofte doch anderswâ
- 1561a,1 dâ ranten zwêne ofte einen an
1561a,2 der dem di tjoste dort an gewan
1561a,3 ze treviers der sîn sper verstach
1561a,4 sô was dem ûf di tjoste sô gâch
1561a,5 daz er ze der winster dâ sîn sper
1561a,6 verstach dem was alze ger
1561a,7 dô kom man dort den an gerant
1561a,8 êr ie kom sper dâ in sîn hant
- 1562a,1 mit disen vrôuweden ende nam
1562a,2 der tac diu vinster naht bequam
1562a,3 di maniger niht ungerne sach
1562a,4 dô vuoren si an ire gemach
1562a,5 die dâ von müede liden nôt
1562a,6 von tjoste dâ arme wâren rôt
1562a,7 geswollen swarz unde dâr zuo blâ
1562a,8 dem war daz dort dem war daz dâ
- 1563a,1 des andern morgenes harte vruo
1563a,2 di biderben zogeten aber zuo
1563a,3 gezimiert daz is wâr wünnicliche
1563a,4 ir was vile maniger muotes rîche
1563a,5 daz wart volliclichen schîn
1563a,6 vile maniger diene der vrouwen sîn
1563a,7 daz er den puneiz alsô reit
1563a,8 daz ez dem andern wart vile leit
- 1564a,1 ez wart des tages aber guot getân
1564a,2 von manigem minne gernten manne
1564a,3 ûf dem velde hier unde dort
1564a,4 wart loch mit sper durch schilt geboret
1564a,5 di von der tavelrunde sich
1564a,6 wole werten dâ des vrôuwete ich mich
1564a,7 ez was ouch müezic niht mîn hant
1564a,8 von mir wart ouch dâ sper verswant

- 1565a,1 an disem buoche ist niht sô . vile
1565a,2 sô von tjustierene dâ von wile
1565a,3 ich ez iu kürzen swâ ich mac
1565a,4 ditz werte unz an den vünften tac
1565a,5 daz wir des morgenes vruo
1565a,6 griffen mit tjustierene zuo
1565a,7 unde triben daz unz an den âbent gar
1565a,8 bî mîner hövischheit daz ist wâr
- 1566a,1 nû merket reht swaz ich iu sage
1566a,2 des âbendes an dem vünften tage
1566a,3 kom ein bote zuo mir geriten
1566a,4 der gruoze mich mit hövischen siten
1566a,5 unde sprach “küninc Artûs möhte ez sîn
1566a,6 ich solte iuch von dem hêrren mîn
1566a,7 gesprechen vüre wâr gar heimelîche”
1566a,8 sô sprach der bote zühterîche
- 1567a,1 ich sprach “des bin ich iu bereit”
1567a,2 mit im ich von den liuten reit
1567a,3 dô sprach er “werder küninc rîche
1567a,4 iu hât der vürste Vriderîch
1567a,5 bî mir entboten alsô her
1567a,6 daz er vile schône wile driu sper
1567a,7 gein iu verstecken hier enzwei
1567a,8 daz sol geschehen vore dem turnei
- 1568a,1 er jihet ez sî hier alsô vile
1568a,2 getjustieret daz er iuch . des wile
1568a,3 biten daz ir ez durch in lân
1568a,4 wan er vile grôze unmuoze hât
1568a,5 ir sület den turnei teilen lân
1568a,6 dâ mit daz tjustieren understân
1568a,7 des bitet iuch der hêrre mîn
1568a,8 iemer durch den dienst sîn”
- 1569a,1 ich sprach “ich tuon reht swaz er wile
1569a,2 ez sî lützel oder vile
1569a,3 des bin ich alles im bereit
1569a,4 durch sîn vile hôhe werdicheit
1569a,5 dû solt sîn alle di ritter biten
1569a,6 von im mit zühticlîchen siten
1569a,7 daz si die zuht gein im begân
1569a,8 daz si daz tjustieren durch in lân”
- 1570a,1 der bote reit dô alzehant
1570a,2 wider in den rinc dâ er vant
1570a,3 der ritter halten harte vile

1570a,4 er sprach zuo in “vile gerne ich wile
1570a,5 iu allen hier sagente sîn
1570a,6 ein boteschaft von dem hêrren mîn
1570a,7 dem werden vürsten Vriderîch
1570a,8 er heizet iuch grüezen minniclîche

1571a,1 iuch bitet der werde hêrre mîn
1571a,2 daz ir daz tjostieren lât sîn
1571a,3 daz ir turnieret daz ist sîn rât
1571a,4 wan er vile grôze unmuoze hât
1571a,5 er muoz vone hinnen daz ist wâr
1571a,6 sô verdürbe der turnei gar
1571a,7 daz wære im leit solte daz geschehen
1571a,8 wan er in gerne wolte sehen”

1572a,1 dô sprach der schenke von Habechesbach
1572a,2 “iuwerm hêrren ist ze dem turnei gâch
1572a,3 wile aber selbe er wâpen hier tragen
1572a,4 vile werder bote daz sület ir sagen
1572a,5 sô teilen wir den turnei
1572a,6 ûf in unde ûf den küninc enzwei
1572a,7 unde koment si beide in eine schar .
1572a,8 sô hêten die andern verloren gar”

1573a,1 der bote sprach “des en weiz ich niht
1573a,2 ich weiz vüre wâr daz er sihet
1573a,3 den turnei des hôrte ich in jehen
1573a,4 er wolte in endelîche sehen
1573a,5 ist daz ich iu dâr an dienen sol
1573a,6 sô ervar ich iu daz wole
1573a,7 ob er welle hier wâpen tragen
1573a,8 unde iu daz hinde wile ich her wider sagen”

1574a,1 die ritter sprâchen alle dô
1574a,2 “wir sülen ze kirechen komen vruo
1574a,3 unde teilen dâ den turnei
1574a,4 geschihet daz vruo daz ist uns guot
1574a,5 hier ist manic ritter hôchgemuot
1574a,6 daz den des zerrinne niht
1574a,7 als ofte an maniger stat geschihet”

1575a,1 mit vröuweden schieden wir uns dâ
1575a,2 mannegelîch reit schône sâr
1575a,3 dâ er die naht vant guot gemach
1575a,4 sâr dô der ander tac ûf brach
1575a,5 dô reit zuo mir vile snelliclîche
1575a,6 des vürsten bote ûz Ôsterrîche
1575a,7 der gruoze mich von dem hêrren sîn

1575a,8 des dankete mit zühten im der munt mîn

1576a,1 er sprach “iu hât der hêrre mîn
1576a,2 entboten ot aber den dienest sîn
1576a,3 unde hiez iu daz verholen sagen
1576a,4 er wolte hier selbe wâpen tragen
1576a,5 unde wolte mit iu hier endelîche
1576a,6 driu sper verstecken ritterlîche
1576a,7 er wile durch diu vile reinen wîp
1576a,8 urbâren hier ritterlîche den lîp

1577a,1 ez wile der werde hêrre mîn
1577a,2 hier under der Briuzel banier sîn
1577a,3 mit den wile er iuch bestân
1577a,4 ir müezet vile guot helfe hân
1577a,5 oder er tuot iuch alumbe hier
1577a,6 ich gesach in hôchgemuoter nie
1577a,7 er ist gemeit unde dâr zuo vrô
1577a,8 sîn muot der stât von vrouwen hôh”

1578a,1 ich sprach “ich mac vore im genesen
1578a,2 unde wile mir got genædic wesen
1578a,3 ê daz er umbe tuo mich hier
1578a,4 nôt müezen lîden ritters knie
1578a,5 von maniger hurticlich vart
1578a,6 er vindet an uns gegenhart
1578a,7 swie hôhes muotes sîn lîp vert
1578a,8 im wirdet daz velt alhier gewert”

1579a,1 diu rede geschach des morgenes vruo
1579a,2 ze kirechen vuoren wir alle dô
1579a,3 dô sich diu messe verendete dâ
1579a,4 dô vuoren wir alle schône sâr
1579a,5 in einen garten wünniclich
1579a,6 dar kom manic ritter muotes rîche
1579a,7 den turnei teilete man alzehant
1579a,8 wie daz tuon ich iu wole bekant

1580a,1 ich was selbe zehent komen dar
1580a,2 dô hête gemêret sich mîn schar
1580a,3 von den die tavelrunde stat
1580a,4 wurben dâ mit ritters tât
1580a,5 der wâren zehen unde dâr zuo drî
1580a,6 der herze was vore schanden vrî
1580a,7 si wâren ritterlîche gemuot
1580a,8 vore ritters wandel wole behuot

1581a,1 zuo mîner schar man teilen sach

1581a,2 den schenken sâr von Habechesbach
1581a,3 der ie mit arbeit êre holete
1581a,4 zuo mir geviel ouch hêrr Kadolt
1581a,5 der biderbe wîse was er genant
1581a,6 von zuht von tugenden wît erkant
1581a,7 er was vore wandel gar behuot
1581a,8 ich gesach nie ritter baz gemuot

1582a,1 zuo mir geviel ouch hêrr Heinrîch
1582a,2 von Liechtenstein der muotes rîche
1582a,3 von Haselouwe der biderbe man
1582a,4 geviel ouch zuo mir der nie gewan
1582a,5 decheinen muot der êre entrant
1582a,6 hêrr Otte sô was er genant
1582a,7 sîn lîp was wandels vrî
1582a,8 im was vile hôhiu tugende bî

1583a,1 gegen mir ze were geschaffet wart
1583a,2 hêrr Heinrîch unde hêrr Wernhart
1583a,3 die lebeten beide vile ritterlîche
1583a,4 des vürsten gesinde ûz Ôsterrîche
1583a,5 viel mit sîner schar zuo in
1583a,6 ez was ire muot unde ouch ire sin
1583a,7 daz si des tages gewonnen guote
1583a,8 unde êren vile sus stuont ire muot

1584a,1 von Missouwe mîn hêrr Otte sâr
1584a,2 geviel in ouch ze helfe dâ
1584a,3 von Vrônehoven mîn hêrr Kol
1584a,4 geviel zuo in der tet ez wole
1584a,5 ofte daz rede ich âne spot
1584a,6 von Valkenberc mîn hêrr Râtbôt
1584a,7 geviel zuo in der zornic man
1584a,8 der ofte vlüeche vile gewan

1585a,1 der turnei was geteilet nû
1585a,2 des wâren die hôchgemuoten vrô
1585a,3 wir zogeten ûf daz velt zehant
1585a,4 die helme man snellîche ûf bant
1585a,5 unde scharten uns dort unde hier
1585a,6 nû hoeret mich ich sage iu wie
1585a,7 vier schar dâ wurden unde niht mêr
1585a,8 den biderben was nâch êren wê

1586a,1 des vürsten gesinde ûz Ôsterrîche
1586a,2 die scharten sich dâ ritterlîche
1586a,3 zuo den sich scharn dâ began
1586a,4 von Missouwe der vile biderbe man

1586a,5 diu schar diu den turnei solte heben
1586a,6 si stapfeten bî einander eben
1586a,7 unde habeten sich zesamene wole
1586a,8 als man ze rehte gegen vîanden sol

1587a,1 dâ reit ein schar vile schoene nâch
1587a,2 geschart vile eben ir was niht gâch
1587a,3 in der schar reit mîn hêrr Kol
1587a,4 von Vrônhoven gezimiert wole
1587a,5 die Briuzel in der schar ouch riten
1587a,6 gezimiert wole nâch ritters siten
1587a,7 hêrr Râtbôt in der schar ouch reit
1587a,8 von Valkenberc der ungemeit

1588a,1 zuo mîner schar sich schône scharte
1588a,2 ein ritter der sich hête bewart
1588a,3 vore allem dem daz missestât
1588a,4 sîn lîp begie manic ritters tât
1588a,5 mit sîner ellenthaften hant
1588a,6 hêrr Kadolt wîse was er genant
1588a,7 er was der vrouwen dienstman
1588a,8 dâ von er hôhen lop gewan

1589a,1 nâch mîner schar man stapfen sach
1589a,2 geschart wole die von Habechesbach
1589a,3 bî den geschart reit ritterlîche
1589a,4 von Liechtenstein mîn hêrr Heinrîch .
1589a,5 von Haselouwe der biderbe man
1589a,6 hêrr Otte reit dâ der nie gewan
1589a,7 decheinen unritterlîchen muot
1589a,8 er was vore schanden gar behuot

1590a,1 mit disen scharn wir schône hier
1590a,2 zesamene stapfeten nû hoeret wie
1590a,3 hêrr Kadolt wîse zwei ros gewan
1590a,4 vûre wâr reht als ein biderbe man
1590a,5 in die malîe rante er vûre
1590a,6 swer dâ diu ros gegen in verlûre
1590a,7 die nenne ich iu hier zehant
1590a,8 si wâren dâ beide wole bekant

1591a,1 von Capellen hêrr Pilegerîn
1591a,2 hêrr Reinbôt von Newalîn
1591a,3 sus wâren genant die zwêne man
1591a,4 den hêrr Kadolt an gewan
1591a,5 diu orse dâ daz is wâr ritterlîche
1591a,6 des vürsten bote ûz Ôsterrîche
1591a,7 kom dare gerant vile snelle zuo

1591a,8 ez was dannoch des morgenes vruo

1592a,1 er reit vile snellîchen dar

1592a,2 dâ die Briuzel under ire schar

1592a,3 in hôhem muote schône riten

1592a,4 gezimiert wole nâch ritters siten

1592a,5 dô er die bruoder beide ersach

1592a,6 der bote vile bloediclîchen sprach

1592a,7 “ir sület iuwer turnieren lâzen sîn

1592a,8 daz gebiutet iu der hêrre mîn

1593a,1 er mac iu niht gehelfen hier

1593a,2 ich gesach in ungemuoter nie

1593a,3 er ist in ungemuote komen

1593a,4 im ist sîn vrôuwede gar benomen

1593a,5 ich hôrte in ûz der mâze klagen

1593a,6 war umbe daz getar ich niemanne sagen

1593a,7 ez ist ein sô gar swach geschiht

1593a,8 daz ich si iu getar gesagen niht”